

## VASEGA AMATA 2025

### MANATU AOAQ ; FAALAGOLAGO I LE ATUA I TAIMI UMA

#### **MANATU TAIALA O IANUARI: O LE FANAU A ATAMU MA EVA**

O le manatu taiala o lenei masina aua le amataga o lenei tausaga, o uluai fanau a le lalolagi na tupuga mai ia Atamu ma Eva. O le au uso tama o Kaino ma Apelu, e ui lava na i ai se feeseesea'iga i lenei au uso, peita'i e le i tu'ulafoa'iina lava e le Atua.

**ASO SA: 26 IANUARI 2025 (ASO SA O TUPULAGA)**

**MATAUPU: O KAINO MA APELU**

**SINI:** Ia malamalama le vasega, o Kaino ma Apelu o uluai fanau ia a le lalolagi

**TUSI FAITAU:** Kenese 4: 1 – 3

Fuaiupu 2: "Ua toe fanau mai foi e ia o lona uso o Apelu. O Apelu foi, o le leoleo mamoe o ia; a o Kaino, o le galue fanua ia"

#### **FESOASOANI MO FAIAOGA:**

O Kaino ma Apelu o uluai fanau ia a le lalolagi, po o tamaiti muamua lava ia na i ai i le lalolagi. O le fanau i laua a Atamu ma Eva, o uluai tagata na faia e le Atua.

O Kaino o le ulumatua, ma o ia o se tagata e galue i le fanua. O le tagata e galue i fanua, o lona uiga, e sua le palapala ma fa'ato'a le fanua e toto ai meaai. A o Apelu le uso laitiiti, o ia o le fai lafu manu, o le leoleo mamoe, e galue i le tausia lelei o lana lafu mamoe, fafaga ma faa feinu.

Tatou le fanau, ia avea oe ma tama ma teine lelei e fa'aaogaina e le Atua mo soo se feau ua finagalo i ai. E fa'aaogaina faapefea? O lou tiute, o le faalogo ma usitai i matua ma faatino feau ma galuega e faatonuina ai outou e tatau ona fai. Ia toaaga e galulue faamaoni, ma ia fiafia e fai le mea sili mo le Atua

#### **UIGA O UPU:**

- i) ulua'i – muamua
- ii) lafu – o loo faatusa i le faitauga o manu poo le aofaiga o manu. Faataitaiga lafu moa, afu mamoe etc..
- iii) silasila – vaai

#### **GALUEGA FAATINO:** Faatino le tala

Tofi ni tamaiti se toatolu e faatinoina le tala. O tagata autu o le tala, o Kaino, Apelu ma le Atua, faataitai le osiga o le taulaga i luma o le Atua. Manaia ae tapena ni apa fafano se lua ma ni pepa A4, e tuu i totonu o le apa; ona fa'aaoga lea o se afi tusi e tutu ai le pepa ina ia mu, e faa foliga o se taulaga ua mu ma ua talia e le Atua. Faamolemole fautuaina faiaoga e vaai lelei tamaiti nei mu se tasi.

**PESE:** Faalogo ma usitai

Faalogo ma usitai e leai se isi ala  
E fiafia ai Iesu pe a faalogo ma usitai  
Faalogo ma usitai e leai se isi ala  
E fiafia ai Iesu pe a faalogo ma usitai

Galue ma le faamaoni, galue ma le faamaoni  
Fiafia ma le olioli e te maua ai le tau  
E au mai o Iesu, e au mai o Iesu  
Pe a fai tatou te galulue ma le faamaoni

**A'OA'OGA:**

1. Ia toaga e galue
2. Fai le mea sili mo le Atua
3. Faamaoni e fai feau i lou aiga



**Kaino le galue fanua ma Apelu le fai lafu manu**

## **MANATU TAIALA O FEPUARI & MATI: E FAASAOINA E LE ATUA I TATOU**

A tutupu faafitauli po o ni faalavelave ia i tatou, tatou te lagona lava le fefefe ma le popolevale. Peitai, e le mafai lava ona nofonofa le Atua lo tatou Tapaau Sili; o Ia e na te faasao ma lavea'iina i tatou.

**ASO SA:**                   **2 FEPUARI 2025**

**MATAUPU:**               **UA ULUFAFO NOA MA LONA AIGA I LE VAA**

**SINI:**                       Ia malamalama le vasega, o le ulufafo o Noa ma lona aiga mai le vaa, na o latou vivii ai ma faafetai i le Atua

**TUSI FAITAU:**       Kenese 8: 15 – 20

Fuaiupu 16: “Ina ulufafo ia i le vaa, o oe, ma lau avā ma ou atalii, faatasi ma oe”

### **FESOASOANI MO FAIAOGA:**

Ina ua mavae atu le lolo, ona fetalai atu lea o le Atua ia Noa, “Ina ulufafo ia i le vaa, o oe, ma lau ava ma ou atalii, faatasi ma oe”. Ona o mai ai lea i fafo o Noa ma lona aiga faatasi ai ma manu. O le fetalaiga lea a le Atua ia Noa, ina ia tutupu ma ia uluola le lalolagi.

O lona uiga ia fanafanau Noa ma lana fanau faapea foi i manu eseese uma. O manu vaefa fanua, o manu fetolofi, o manu lele o meaolafa uma ina ia faatuputeleina ai le lalolagi. Ua latou ulufafo ma le vaa, ua taitasi lava ma lona ituaiga.

Ona ulufafo lea o Noa ma lana fanau, ua latou fai le taulaga mu, o le taulaga faafetai i le Atua, ina ua faasaoina i latou mai le lolo. O le fai o le taulaga, o le loto faafetai o le viiga i le Atua ona o lona alofa ma lona agalelei.

### **UIGA O UPU MA FUAITAU**

- i)      ulufafo           –      savali i fafo
- ii)     avā                   –      toalua (faatatau i le toalua o Noa)
- iii)    uluola              –      faatoteleina
- iv)     fetolofi             –      totolo
- v)     taitasi ma lona uiga – o le o faatasi. O loo faatatau i ituaiga manu eseese, ua vaevae ma ua alu lava le manu ia i lona ituaiga poo lona aiga o loo sau ai.

### **GALUEGA FAATINO: VALIVALIGA ATA**

Manaia ae fai se kopi o le ata o loo i le tusi / pe saunia lava e lau susuga se ata e talafeagai e faatatau i le tala sa faamatalaina. O le ata o Noa ma le vaa, ona tufatufa lea i le vasega e vali lava le ata a le tama poo le teine, e toe ao pe a mae'a le vasega.

**PESE:**                   **O AI NA FAU LE VAA?**

O ai na fau le va'a ×2  
O Noa ×2  
O ai na fau le vaa?  
O Noa na fau le vaa  
Ua o mai nei o manu ta'i lua  
O povi asini ma solofanua  
O ai na fau le vaa? O Noa na fau le vaa  
Ua o mai nei o manu ta'i fa  
O manu pepeti ma lapopo'a  
O ai na fau le vaa? O Noa na fau le vaa  
Ua o mai nei o manu ta'i ono


O manu fetolofi ma manu osooso  
O ai na fau le vaa? O Noa na fau le vaa  
Ua o mai nei o manu ta'i valu  
O manu etoeto ma manu lamulamu  
O ai na fau le vaa? O Noa na fau le vaa  
Ua o mai nei o manu ta'i sefulu  
O manu uumi ma manu pupu'u  
O ai na fau le vaa? O Noa na fau le vaa  
Savali mai Noa ma tu i le faamalama  
Ma talotalo atu i le motu o tagata  
O ai na fau le vaa? O Noa na fau le vaa.

**A'OA'OGA:**

1. Ua faasaoina Noa ma lona aiga mai le lolo
2. E faaola e le Atua i tatou pe a faalogo ma usitai



**UA ULUFAFO NOA MA LANA FANAU MAI LE VAA**



**ASO SA:** 9 FEPUARI 2025

**MATAUPU:** UA PEPESE FIAFIA ISARAEU

**SINI:** Ia malamalama le vasega, na pepese fiafia Isaraelu auā ua manumalo le Atua ia Aikupito

**TUSI FAITAU:** Esoto 15: 1 – 4

Fuaiupu 1: “Ona pepese ai lea o Mose ma le fanauga a Isaraelu i lenei pese i le Alii, ua latou fai ane, o loo faapea, Ou te pese i le Alii, aua ua matua manumalo o ia; o le solofanua atoa ma le na tietie ai, ua ia lafoina i le sami”

### **FESOASOANI MO FAIAOGA:**

O ai e fiafia e pese? Ioe, o le pese e aumai ai lagona fiafia, faanoanoa, ia pe tagi ai foi. E mafua mai ona o upu ma le fati, ia poo le tagata foi o loo autu i ai le pese. Peitai o le pepese o le nuu o le Atua, o le pese fiafia ina ua faasoina i latou mai ia Aikupito.

Ua laveaiina ma faasao mai Isaraelu mai le lima sauā o Farao. E ui lava ina tuu atu e Farao le nuu e o, ae na ia toe tuliloa lava e fa’ao’o le oti ia Isaraelu, peita’i e le i taunuu. Ua faia e le Atua le vavega ma faasoina mai Isaraelu ina ua latou savalia ma sopoia le sami ulaula.

Tamaiti, ua faaola Isaraelu mai le lima o Aikupito, ua le mafai ai e Farao ma lana au tau ona fa’ao’o le oti ia i latou. O le ala lea o le pepese fiafia o Mose ma le nuu o Isaraelu ina ua faasoina i latou. Ua latou vivii atu i le Alii aua o Ia ua afua ai ona manumalo mai ia Aikupito. E leai lava se tasi Atua e tutusa ma le Atua o loo tapuai ai Isaraelu, aua ua Ia faatoilalo i le malosi tele o Farao ma ana ‘au tau.

Fai mai upu o le pese a Isaraelu “O le Alii, o le toa lava ia, o le Alii o lona suafa lea”. O le pese o le manumalo, o le pese faafetai ma le viiga i le Atua.

### **UIGA O UPU:**

- |      |             |   |   |
|------|-------------|---|---|
| i)   | olataga     | – | ola, faaola, maluapapa, paolo e mapu ai le tagata mafatia |
| ii)  | fa’aneene   | – | viiga, mitamita, faafetai                                 |
| iii) | toa         | – | malosi  |
| iv)  | kariota     | – | nofoa faataavalevale, e toso e le solofanua               |
| v)   | gogoto      | – | malelemo  |
| vi)  | sami ulaula | – | sami  |

### **GALUEGA FAATINO: HAKA**

Manaia ae a’o le haka lea i tamaiti, e faatino pe a ma’ea le faamatalaina o le tala. O le haka e faatatau i le pepese fiafia o Isaraelu ina ua laveaiina i latou e le Atua. Lea ua avatu le faaitaiga i lalo, a finagalo i ai lau susuga le faiaoga e fa’aaoga lelei, ae a leai foi ae mana’o e sui i au lava upu manaia foi.



Israelu sauni...HI  
Israelu pepese fiafia  
Aikupito uma ua faaumatia  
Le Atua Oe o le toa malosi  
O Ia o le ala, ma le Upu Moni

Faafetai i lou Alofa tele  
Lavea'i matou i lou Silisili Ese  
Foi la o le viiga i le Atua  
'Aua nei galo, ia e faamuamua...HE

### **PESE: I'VE GOT THE JOY**

I've got the joy, joy, joy, joy  
Down in my heart (where?)  
Down in my heart (where?)  
Down in my heart  
I've got the joy, joy, joy, joy  
Down in my heart (where?)  
Down in my heart to stay  
And I'm so happy, so very happy  
I've got the love of Jesus in my heart  
Yes I'm so happy, so very happy  
I've got the love of Jesus in my heart

I've got the peace that passes understanding  
Down in my heart (where?)  
Down in my heart (where?)  
Down in my heart  
I've got the peace that passes understanding  
Down in my heart (where?)

### **A'OA'OGA:**

1. E malosi le Atua
2. Fiafia e pese i le Alii

Down in my heart to stay  
And I'm so happy, so very happy  
I've got the love of Jesus in my heart  
Yes I'm so happy, so very happy  
I've got the love of Jesus in my heart

I've got the love of Jesus, love of Jesus  
Down in my heart (where?)  
Down in my heart (where?)  
Down in my heart  
I've got the love of Jesus, love of Jesus  
Down in my heart (where?)  
Down in my heart to stay  
And I'm so happy, so very happy  
I've got the love of Jesus in my heart  
Yes I'm so happy, so very happy  
I've got the love of Jesus in my heart



**UA PEPESE FIAFIA ISRAELU I LE ATUA**

**ASO SA:** 16 FEPUARI, 2025

**MATAUPU:** UA FAAOLA E IESU Ē NA MAMA'I

**SINI:** Ia malamalama le vasega, o le faamaloloina e Iesu o tagata mama'i, na mulimuli ai le motu o tagata ia te Ia

**TUSI FAITAU:** Mataio 4: 23 – 25

Fuaiupu 23: “Ua faataamilo Iesu i Kalilaia uma, ua ia a’oa’o i o latou sunako, ua ia tala’i atu foi le tala lelei o le malo, ma faamalolo e ia o ma’i uma ma ma’i tiga uma o le nuu”

### **FESOASOANI MO FAIAOGA:**

O ai foi le Uo Silisili a tatou tamaiti? Ia sa’o lelei o Iesu le Uo a tamaiti. Auā foi e alofa Iesu ia i tatou i taimi uma ma aso. E faapena foi la le tatou tala, e pei ona alofa o Iesu ma faamalolo i e na mama’i. O lea fa’atoa uma lava ona tofia so’o o Iesu o Simona Peteru ma lona uso o Anetere’a faapea foi le fanau a Sepetaio o Iakopo ma Ioane. Ua latou o ma Iesu ua taamilo i totonu o Kalilaia uma, ma a’oa’o atu i totonu o sunako ma tala’i le Tala Lelei o le malo o le Atua.

E pei o i tonu i le taimi lea ua amata ai le galuega tala’i a Iesu ma lona au so’o, lea na faamalolo ai e Iesu o e na mama’i. Ua faaola e Iesu le tele o ituaiga ma’i, e pei o le ma’i maliu, ma’i supa, o le tagata ua ulu ai le temoni ia ma le tele o isi ma’i eseese.

Ioe, ua faamalolo e Iesu e na mama’i. E matautia ma ofoofogia vavega na faia e Iesu e pei ona faamatala mai e le tusi o Mataio. O se vaaiga uiga ese na molimauina e tagata, na vaai i vavega na faia e Iesu. Fai mai le tusi o Mataio, “Ona mulimuli atu lea ia te ia o le motu o tagata e toatele mai Kalilaia, ma Tekapoli, ma Ierusalem, ma Iutaia, ma ona tala atu o Ioritana”. O le mulimuli o le motu o tagata e toatele ia Iesu, o le ata vaaia lea o lo latou faatuatua ma lo latou talitonu moni ia Iesu Keriso.

### **UIGA O UPU:**

- |                  |   |                               |
|------------------|---|-------------------------------|
| i) sunako        | – | fale tapua’i                  |
| ii) fa’amālōlō   | – | fa’amanuia                    |
| iii) puapuagatia | – | tigāina                       |
| iv) luitinoina   | – | ulufia                        |
| v) temoni        | – | satani                        |
| vi) ma’i maliu   | – | ma’i oso ia po’o le ma’i tete |

### **GALUEGA FAATINO: VALIVALI ATA**

Manaia ae fai ni kopi o le ata o loo i lalo ina ia tufatufaina i le fanau / pe mafai foi ona saunia nisi ata talafeagai ua silafia e lau susuga le faiaoga, mo le galuega faatino a le fanau.

### **PESE: O IESU O LE MANUMALO**

O Iesu o Ia o le manumalo ×3  
E manumalo, e manumalo  
O Iesu o Ia o le manumalo  
E manumalo i aso uma

**Tali:**

E manumalo, e manumalo  
E manumalo, e manumalo ×2  
O Iesu e manumalo  
Satani o le to'ilalo  
E to'ilalo, e to'ilalo  
Satani o le to'ilalo  
E toilalo i aso uma

**Tali:**

E to'ilalo, e to'ilalo  
E to'ilalo, e to'ilalo ×2  
E toilalo, e toilalo  
Satani e toilalo

**A'OA'OGA:**

1. E alofa Iessu i tagata uma
2. O Iesu le fomai sili

Jesus is a winner man  
Jesus ia a winner man ×3  
Jesu is a winner man  
A winner man all the time

**Chorus:**

A winner man ×7  
A winner man ×4  
A winner man all the time

Satan is a loser man ×3  
Satan is a loser man  
A loser man all the time

**Chorus:**

A loser man ×7  
A loser man ×4  
A loser man all the time



**UA FAAMALOLO E IESU TAGATA MAMA'I**



Copyright ©Sermons4Kids | All Rights Reserved | [www.sermons4kids.com](http://www.sermons4kids.com)

**ASO SA:** 23 FEPUARI 2025

**MATAUPU:** O LO’O OLA PEA IOSEFA

**SINI:** Ia malamalama le vasega, o le malaga atu o le fanau a Iakopo i Aikupito, na latou iloa ai, o loo ola pea lo latou uso o Iosefa

**TUSI FAITAU:** Kenese 45: 25 – 28

Fuaiupu 26: “Ona latou ta’u atu lea ia te ia, ua faapea atu, O loo ola Iosefa, ua pule foi o ia i le nuu uma o Aikupito. Ona vaivai ai lea o lona loto, aua ua na le talia a latou upu”

### **FESOASOANI MO FAIAOGA:**

O Iosefa o le atalii lona 11 lea a Iakopo mai lana fanau e toa 12. O Iosefa o lona tina Rasela. O Iosefa foi lea, sa faatau atu e ona uso i tagata Mitiana, ina ua fai ai e ona uso le togafiti. Le togafiti lena, na latou o ma ta’u atu i lo latou tama o Iakopo, ua maliu Iosefa ai ua ‘ai e manu feai. Peitai lea na latou fasi ai le tamai mamoe ma fufui ai le ofu o Iosefa e foliga ua ‘aina e se manu feai. Ua tagi le toeaina o Iakopo ona lona alofa i lona atalii.

Ua alu aso, sau aso, ona o’o ai lea o le oge i le nuu o Kanana, ona o ai lea o le fanau a Iakopo i Aikupito e faatau ni a latou meaa. Peitai na faateia i latou ina ua o atu i Aikupito o loo fai Iosefa lo latou uso ma alii sili. O lea na toe foi ai le auuso lenei ma ta’u atu i lo latou tama o Iakopo ma faapea atu “O loo ola Iosefa, ua pule o ia i le nuu uma o Aikupito”. Ua te’i le toeaina i le tala ua o atu nei ma lana fanau, o le ala lea o le vaivai o lona loto, o lona uiga ua le mautonu, ua ofo ua faigata ona ia taliaina se tala ua avatu.

Peitai o se fiafiaga tele lenei ia Iakopo ina ua ia maua le tala o loo ola pea lona atalii. Ua auina atu e Iosefa o fata faataavalevale e aami ai lona tama, ona toe malosi ai lea o lona loto. O lea la na faapea ifo ai Iakopo “O loo ola mai pea lo’u atalii o Iosefa; ou te alu, ma te feiloai ma ia manu ou te lei oti”

### **UIGA O UPU:**

- i) Kanana – o le nuu sa nonofo ai uso o Iosefa ma lona tama o Iakopo
- iii) fata faataavalevale – o le fata po o le nofoa, e fai ona pa’u faataavalevale
- iii) ami – aumai

### **GALUEGA FAATINO: FESILI MA TALI**

1. O ai foi le igoa o le atalii lona 11 a Iakopo?  
Tali: Iosefa
2. O ai e ana upu ia, “O loo ola mai pea lo’u atalii o Iosefa”  
Tali: Iakopo
3. O fea le nuu lea sa i ai Iosefa?  
Tali: Aikupito

**PESE:**

God is so good ×3  
He's so good to me

He cares for me ×3  
He's so good to me

God answers prayer ×3  
He's so good to me

E lelei le Atua ×3  
E agalelei ia te au

Na Ia puipui ia te au ×3  
E agalelei ia te au

E tali le Atua i le tatalo ×3  
E agalelei ia te au

**A'OA'OGA:**

1. Sa faatasi le Atua ia Iosefa i taimi uma
2. E agaleleli le Atua ia i tatou





**O IOSEFA MA IAKOPO**

**ASO SA: 2 MATI 2025**

**MATAUPU: UA VIVII ATU LE FAFINE I LE ATUA**

**SINI:** Ia malamalama le vasega, na vivii le tinā i le Atua ina ua malolo o ia

**TUSI FAITAU:** Luka 13: 10 – 13

Fuaiupu 13: “Ua faaee atu e ia ona aao ia te ia; ona fa’asa’oloaina lea o ia, ua vivii atu o ia i le Atua”

**FESOASOANI MO FAIAOGA:**

Tamaiti o le ola vivii i le Atua, o le galuega faifai pea lea a i tatou i aso uma ma taimi uma. E faapena i totonu o tatou aiga, i afiafi; e ta mai loa faigalotu ona fai loa lea o le lotu. O le tatou faafetai ma vivii i le Atua i lona alofa mai ia i tatou. Aemaise i taimi e tatou te mama’i ai, e tatou te tatalo i le Atua, ina ia faamaloloina i tatou.

O le taimi o loo a’oa’o atu ai Iesu, ia poo la e fai foi lana lauga i totonu o le fale tapua’i; na Ia iloa ai se tasi fafine ma’i ua atoa le 18 tausaga o ma’i. O le fafine e le mafai ona tu sa’o, e alu fa’ano’uno’u. Ua silafia lelei e Iesu le mafatia o lenei fafine i lona ma’i, o le ala lea na Ia valaau atu ai ia te ia “Funa e, ua tatalaina lou vaivai”. Ua faaee atu foi ona aao ia te ia, ona sa’o ai lea o lona tua. Na fiafia o ia ma vivii atu i le Atua.

Fanau, ia o tatou vivii ma faafetai i le Atua. ‘Aua nei galo ona e faafetai i le Atua i mea uma ua faia mo i tatou uma. O ma’i faigata e o’o mai ia i tatou, o le Atua lava tatou te mapu ai. O lona uiga le fanau, nei galo lau faafetai ma lou ola vivii i le Atua.

**UIGA O UPU:**

- i) sunako – fale tapuai
- ii) Sapati – o le Aso Sa
- iii) agaga e vaivai – o le agaga leaga (*evil spirit*)
- iv) fa’ano’uno’u – punou i lalo, e le mafai ona tu sa’o
- v) funa e, – tamaita’i e,
- vi) fa’asa’oloaina – tu sa’o

**GALUEGA FAATINO: FAATINO LE TALA**

Tofi se tama ma se teine, e fai ma tagata autu. O Iesu le tasi ma le fafine ma’i le tasi, ae manaia ae omai uma le vasega e fai ma tagata lotu i totonu o le sunako. Ona faatino ai lea o le vaaiga e pei ona molimauina i totonu o le tala, e ala i le faamaloloina e Iesu o le fafine. Ia atagia i le faatinoga le autu o le mataupu e ala i le vivii atu o le fafine i le Atua.

**PESE:** VIVII MA FAAFETAI I LE ATUA (fati: Waka waka by Shakira)

Faafetai, i le Atua  
I lona alofa, ua ia foai fua

Ua ou ola, maloloina  
Ia faamanu, i le suafa o Iesu

Taofi mau i le Alii  
Tetee o le fili  
Olioli pese oh oh  
Patipati lue eh eh  
Oso i luga ma siva i lalo  
Viiga mo le Alii

Faamalosi oh oh  
Waka waka eh eh  
Tau le taua faaleagaga  
Viiga mo le Alii

Faalogo ma usitai  
Ia nonofo fiafia, fealofani  
Ia toaga e tatalo

Tali mai ai Iesu, i ou manao


Taofi mau i le Alii  
Tetee o le fili

Olioli pese oh oh  
Patipati lue eh eh  
Oso i luga ma siva i lalo  
Viiga mo le Alii

Faamalosi oh oh  
Waka waka eh eh  
Tau le taua faaleagaga  
Viiga mo le Alii

### **A'OA'OGA:**

1. Ia tatou fiafia e vivii i le Atua i taimi uma
2. E faamaloloina e Iesu o tatou mafatiaga uma



**UA FAAMALOLO E IESU LE FAFINE, ONA IA VIVII AI LEA I LE ATU**

**ASO SA: 9 MATI 2025**

**MATAUPU: UA FA'AMALOLO E PAULO LE TAMĀ O POPILIO**

**SINI:** Ia malamalama le vasega, o le tatalo ma le fa'ae'e o lima o Paulo i le tamā o Popilio, na mālōlō ai o ia

**TUSI FAITAU:** Galuega 28: 7 – 10

Fuaiupu 8: “Ua taoto foi le tama o Popilio i le ma'i vevela ma le sana toto; ua alu atu Paulo ia te ia, ma ua tatalo, ona faaee lea e ia o ona lima i luga ia te ia, ua faamalolo ai ia te ia.”

**FESOASOANI MO FAIAOGA:**

O Popilio o le alii o le motu, ia e mafai foi ona faapea o ia o le matai poo le alii sili i totonu o le nuu o Melita. A o Popilio o se tagata Roma, o lona uiga, o ia o se kovana mai Roma i totonu o le nuu o Melita. O ia lea sa na ia taliaina le taunuu atu o Paulo ma malolo ai i lona fale mo aso e tolu.

Peitai o le api ai o Paulo ma lana aumalaga i le fale o Popilio, na ia vaaia ai le tama o Popilio o loo maua i le ma'i vevela ma le sana toto. O lea na alu atu ai loa Paulo ma faamalolo loa ia te ia; ua ia tatalo i le Atua ona fa'ae'e lea o ona lima i luga ia te ia. A o le vaaiga ofoofogia i le tala, e la gata ua malolo le tama o Popilio, ae ua o mai uma le motu o tagata o e na mama'i ma faamalolo uma e Paulo.

Ua uma ona fai le faamalologa a Paulo, ma ua malolo le toatele o tagata. O le ala lea na alofagia ai Paulo ma lana au malaga, ua ofo alofa atu i ai le motu o tagata. Ua latou ave meaalofa, o meaa, aemaise o mea e manaomia tele pe a alu le latou faigamalaga i luga o le vasa. O lona uiga o le taui lena o lo latou agalelei atu ia Paulo ona o le vavega ma le faamalologa na ia faia.

**UIGA O UPU:**

- i) agalelei – alofa
- ii) ma'i vevela – fever
- iii) sana toto – dysentery an infection of the intestines that causes diarrhoea containing blood. Also include painful stomach cramps. O le ma'i e mafua mai i totonu o le manava, ona o se siama ua mafua ai ona tiga, lea e ala ai ona pua'i ia pe alu le manava tulou. Ma'i faigata
- iv) fa'ae'e – faaloaloa ia poo le tuu i luga o lima
- v) faamalolo – faamanuia, faamalosi
- vi) tu'uva'a – malaga ese atu mai se nofoaga / o ese

**GALUEGA FAATINO: TALIGĀ FESILI**

1. O ai lea sa faamalolo e Paulo?  
Tali: O le tamā o Popilio

2. O ai foi Popilio?  
Tali: Oo le alii o le motu
3. Ta'u mai le ma'i o le tama o Popilio  
Tali: O le ma'i vevela ma le sana toto

**PESE:** Jesus loves me

1. Jesus loves me! This I know  
For the bible tells me so  
Little ones to Him belong  
They are weak but we are strong.


Chorus  
Yes! Jesus loves me!  
Yes! Jesus looooves me!  
Yes! Jesus loves me!  
The bible tells me so.

2. Jesus loves me! He who died.  
Heaven's gates to open wide  
He will wash away my sin,  
Let's his little child come in.

3. Jesus loves me! He will stay,  
Close beside me all the way.  
Then his little child will take,  
Up to heaven, for his dear sake.

**A'OA'OGA:**

1. O le mana o le Atua e mafai ai mea uma
2. E tauia lou agalelei atu i isi tagata.



**FAAMALOLOINA E PAULO O LE TAMA O POPILIO**

**ASO SA:** 16 MATI 2025

**MATAUPU:** UA FAASAOINA PETERU E LE AGELU

**SINI:** Ia malamalama le vasega, ua faasaolotoina e le Alii Peteru mai le fale puipui

**TUSI FAITAU:** Galuega 12: 6 – 8

Fuaiupu 7: “Faauta foi, o le agelu a le Alii ua tu mai, ua pupula mai foi le malamalama i le fale; ua na ta ia Peteru i lona itu, ma fafagu ia te ia, ua faapea atu, “Ina tu ia i luga, ia vave”

### **FESOASOANI MO FAIAOGA:**

O se vaaiga i le malosi o le sauaina o tagata kerisiano i le vaitau o le tula’i mai o le malo o Roma. Na fasioti e Herota nisi o le au soo leana maua ai ma si tama o Peteru.

Ua noanoa o ia i maea u’amea e lua ma tu’uina atu loa i le fale puipui. Ua leoleoina le fale puipui, ma o le mea mautinoa e le mafai lava ona toe sola ese Peteru pe a fua atu i le tala. Peita’i, na auina mai e le Atua lana agelu ma na fafagu ia Peteru a o moe ai o ia i totonu o le fale puipui, fai mai ona pa’uū ai lea o maea u’amea sa nonoa ai ona lima. Ona alu lea o ia i fafo, ua mulimuli atu ia te ia

Tamaiti ua faasaoina e le agelu Peteru mai le lima o Herota, ina ua ia tatala ma faasaoloto o ia mai i totonu o le fale puipui. O fea o i ai le fia malosi o Herota? O lea ua faaali le mata’utia ma le malosi o le Alii e ala i lana agelu, na auina mai e faasaoloto ma faaola ia Peteru.

### **UIGA O UPU :**

- i) noanoatia – saisaitia
- ii) maea uamea – o maea malolosi e fili i u’amea, sa faaaoga e nonoa ai pagota
- iii) fale puipui – fale e fausia i u’amea ma simā. E puipui atoa lona fausaga, ua fausia faapitoa mo le tuuina ai o tagata solitulafono
- iv) pupula – malamalama, faailoa mai
- v) pulupulu – ofu poo le faamafanafanaina
- vi) fa’aaliga – faaali mai ia poo se vaaiga uiga ese na vaai i ai. E mafai foi ona faamatalaina, o se miti e ala i mafaufauga ma mea o loo manatu i ai




**GALUEGA FAATINO: FAAFETAUI ATA MA O LATOU IGOA**



Simona Peteru



Agelu



Falepuipui


**PESE:**        E alofa le Atua ia te au

E alofa le Atua ia te a'u  
O mea matagofie ua ou vaaia  
Le nuanua ua susulu mai i lo'u faamalama  
E alofa le Atua ia te a'u

My God loves me  
And all the wonders I see  
The rainbow shine through my window  
My God loves me

**A'OA'OGA:**

1. E faasaoloto e le Atua i tatou
2. Faalagolago i le Atua i taimi uma



**UA FAASAOINA E LE AGELU PETERU**

**ASO SA:** 23 MATI 2025

**MATAUPU:** UA TOE OLA LE TAMA A LE FAFINE SAREFATA

**SINI:** Ia malamalama le vasega, o le alaga a Elia i le Atua na toe ola ai le tama

**TUSI FAITAU:** 1 Tupu 17: 20 – 23

Fuaiupu 21: “Ona fao faatolu lea o ia i luga o le tama, ma alaga atu i le Alii, ua faapea atu, Le Alii e,

**FESOASOANI MO FAIAOGA:**

O Elia o le perofeta, na faatonu e le Atua e alu i le nuu o Sarefata ma api ai i le fale o le tasi fafine ma lana tama.

Ua o’o i le tasi aso, ona ma’i ai lea o le tama a le fafine, ma ua le toe manava, o lona uiga ua oti. Ona alaga ai lea o Elia i le Atua ma faapea atu “Le Alii e, lo’u Atua e, ua e faaoo ea le leaga i le fafine ua oti lana tane, o le ou te aumau ai, ina ua faaoo le oti i lana tama?” Ua fao faa tolu Elia i luga o le tama ma alaga i le Alii ina ia toe faafoi pe toe faaola le tama ma ola ai lea o ia. Ona tuuina atu lea e Elia o le tama i lona tina

**UIGA O UPU:**

- i) alaga – valaau, tagi leotele
- ii) tane – toalua
- iii) faō – punou, ifo
- iv) fa’afoisia – toe aumai, toe faafoi
- v) fa’afofoga – faalogo, lagona
- vi) afeafe – pito i luga o le fale

**GALUEGA FAATINO:** Valivaliga Ata

Saunia e lau susuga i le faiaoga ni pepa A4, poo ni newsprint foi, e tufa i le vasega. E fai ai le latou tusiga ata.

**PESE:** E mata’utia ma ofoofogia  
E matautia e ofoofogia  
O Iesu o lo’u Faaola  
E matautia ma ofoofogia sili lava Ia  
O mata e vaai taliga faalogo  
Ua tusia e le tusi Paia  
O Iesu o lo’u Faaola e sili lava Ia

**A'OA'OGA:**

1. E faafofoga mai le Atua i lo tatou ole atu
2. Ua fiafia le fafine ua toe ola lana tala



**O ELIA MA LE FAFINE SAREFATA**



**ASO SA: 30 MATI 2025**

**MATAUPU: UA SAEIA E SAMASONI LE LEONA**

**SINI:** Ia malamalama le vasega, o le Agaga o le Atua na mafai ai e Samasoni ona fasia le leona

**TUSI FAITAU:** Faamasino 14: 5 – 7

Fuaiupu 6: “Ona osofia lea o ia e le Agaga o le Alii, ua na saeia le leona, e pei ona saeia se tamai ‘oti, a e leai lava se mea i lona lima; ua ia le ta’u atu i lona tama ma lona tina le mea ua na faia”

**FESOASOANI MO FAIAOGA:**

O Samasoni o lona tamā Manoa. Ua o’o i le tasi aso, ona o ai lea o Samasoni ma ona matua ua o’o atu i le tasi nuu o Timenata le igoa, o loo i ai tovine. O i tonu, na vaaia ai e Samasoni le leona taanoa o loo tagi. E le i tuulafoaiina e le Atua Samasoni, ua faatumuina o ia e le Agaga o le Atua ua faateleina lona malosi, ona ia fasi ai lea o le leona. Ua saeia e Samasoni le leona e pei ona ia saeia o se tama’i oti, ae leai se mea sa i lona lima.

Na te le i ta’u atu foi i ona matua le mea ua na ia faia, a o latou o i le ala.

**UPU MA UIGA:**

- i) Timenata – nuu
- ii) tovine – o le faatoaga vine
- iii) leona ta’anoa – tama’i leona (young lion)
- iv) osofia – fa’atumulia, musumusuina
- vi) saeia - sasae, vaelua,

**GALUEGA FAATINO: VALIVALIGA ATA**

E fautuaina lau susuga i le faiaoga, e fai ni kopi o le ata o loo i lalo mo le galuega a faatino a le fanau. Po o le saunia lava e lau susuga ni ata talafeagai e fetau mo le mataupu.

**PESE:** Samasoni Malosi (fati: MP, MP malosi, malosi)

Samasoni, Samasoni malosi malosi  
Tu i luga e faatino lou tofi  
O oe o le naseri a le Atua  
O lou faiva o le ta’ita’i ma tautua

Ua o’o i le tovine o i Timenata  
Faauta i le leona ma lona fia aasa  
Samasoni le toa ua ia saeia  
Le leona taanoa ua fasia

**A'OA'OGA:**

1. O Samasoni o le toa malosi
2. Faalagolago i le Atua pe a feagai ma faigata



**UA SAEIA E SAMASONI LE LEONA**





## MANATU TAIALA O APERILA MA ME: FAAILOA ATU LE ATUA I TAGATA

O le tiute o le tagata, o le ola tapua'i ma vivi'i i le Atua. Ua faataua i nei masina, o Aperila ma Me le autu ua taua i luga o le faailoa atu lea o le Atua i tagata. Tatou te faailoa atu le Atua e ala i a tatou faatinoga ma uiga, e atagia mai ai amio faa le Atua. O le ola tatalo ma le ola tapua'i, o le tatou faailoa atu lava lena o le Atua. Ia fai le amio lelei, ma uiga e atagia mai ai le Atua, ae afai tatou te faia o le amioleaga, o lona uiga o lo tatou faailoa atu foi lena o satani ma ana mailei.

**ASO SA:** 6 APERILA 2025

**MATAUPU:** UA FAAILOA LE ATUA IA IAKOPO

**SINI:** Ia malamalama le vasega, na faaali le Atua ia Iakopo i le miti

**TUSI FAITAU:** Kenese 28: 10 – 14

Fuaipu 12: “Ua fai lana miti; faauta foi, o le apefai ua faatuina i le eleele, ua oo lona iu i le lagi; faauta foi, o agelu a le Atua ua a'ea'e ma ifoifo”

### FESOASOANI MO FAIAOGA:

E tele auala e faailoa mai ai, pe feso'ota'i mai ai le Atua i le tagata i ia ona po. E faailoa mai le Atua i le tagata, e ala mai se vavega, o faailoga ofoofogia, i le ma le anoanoa'i o nisi auala. Sa faailoa mai foi le Atua e ala i le miti pe a o'o i le taimi e momoe ai.

A o alu le tama o Iakopo, ua o'o atu i Karana, ona fai ai lea o lana malologa aua ua o'o i le po. Peita'i ina ua moe o ia, ona fai ai lea o lana miti.

Peita'i o loo tu ai ma le Atua, o le pule silisili ese, e na te faamanuia i tagata, e pei foi ona Ia faamanuia ia Iakopo e tusa o lana miti sa fai. O le faailoa ai e le Atua ia Iakopo e ala i le miti, o le ata vaaia lena o le tumau o le feagaiga a le Atua ia Aperaamo ma Isaako.

Ua tu mai foi i ona luga le Atua, ua fai mai ia te ia, o au o le Alii lou Atua o Aperaamo lou Tama ma le Atua o Isaako. O le fanua foi o taoto ai Iakopo, na foai atu e le Atua mo ia ma lana fanau.

### UIGA O UPU:

- i) miti – fa'aaliga, mafaufauga, li'a
- ii) a'ea'e – savali aga'i i luga, a'e i luga o se mea maualuga (climb up)
- iii) fa'asalalauina – fa'ataape
- iv) i'u – o le isi pito agai i luga, siusiu
- v) apefa'i – o le auala e fesootai ai i se vaega maualuga

**GALUEGA FAATINO:** SAILI MATA'ITUSI O LOO MISI (Find the missing letter)

E taua le faatinoga lenei e saga a'oa'o atili ai le tomai i fanau, latou te iloa ai mataitusi o loo misi mai upu o le a taua i lalo. O le faiga o le faatinoga, mafaufau lelei tamaiti i mataitusi A – R, poo le fea le upu e fetai ai mataitusi (toe vaavaai i le pese)

I A \_\_ O P \_\_ (IAKOPO), P \_\_ R \_\_ S \_\_ P A (PERESEPA), \_\_ A R A \_\_ A (KARANA)

A P E \_\_ \_\_ A \_\_ M \_\_ (APERAMO), I \_\_ A \_\_ K O (ISAAKO)

**PESE: Majesty**

Majesty, Worship His Majesty,  
Unto Jesus, be glory,  
Honour and Praise.  
Majesty, Kingdom authority,  
Flows from His throne,  
Unto His own,  
His anthem raise.

So exalt, Lift up on high,  
The name of Jesus,  
Magnify, come glorify,  
Christ Jesus the King.  
Majesty, Worship His majesty,  
Jesus who died, now glorified,  
King of all kings.

E Paia, le Atua na o Ia,  
Tatou ifo, ma vivii Aleluia,  
Le Tupu, e pule mamalu,  
Ia tumau, e faavavau,  
Lou filemu.

Fa'amanū, ma ta'uta'u,  
Le Suafa o Iesu,  
Keriso, o la'u uo,  
E manumalo.  
Silisili, Iesu ole Alii,  
Na maliu, ua toe tu,  
Mo oe ma a'u.

**A'OA'OGA:**

1. E silisili ese le Atua
2. E i ai le Atua i mea uma
3. E leoleo le Atua ia te oe ma au



**UA FAAILOA LE ATUA IA IAKOPO**

**ASO SA:** 13 APERILA 2025

**MATAUPU:** UA TI'ETI'E IESU I LE ASINI I IERUSALEMA  
(ASO SA LAUPAMA)

**SINI:** Ia malamalama le vasega, o le tietie atu o Iesu i Ierusalemā i le asini, o lana malaga faatupu mo le sauniga faamanatu o le paseka

**TUSI FAITAU:** Mataio 21: 7 – 11

Fuaiupu 9: “O le motu o tagata ua muamua, ma e ua mulimuli, ua alalaga i latou, ua faapea mai, “Osana i le alo o Tavita; ia manuia le afio mai i le suafa o le Alii. Osana i mea e aupito i luga”

### **FESOASOANI MO FAIAOGA:**

O le tala masani mo i tatou i lenei taeao, tatou te faamanatuina pea i lea tausaga ma lea tausaga, le malaga atu o Iesu i Ierusalemā. Ua auina atu e Iesu lona auso'o e toalua i le tasi aai o loo i ai le asini ma lana tama o loo nonoa ai. Ua la aumai le tama'i asini, ma fa'ae'e ai ofu ma fa'ati'eti'e ai loa le Alii.

Ua latou fola laupama i le auala faapea ma o latou ofu, ae afio mai le Faaola. O le uiga lena o le afio mai o Iesu, ina ia faaola le lalolagi agasala.

O le ala lea o le alalaga o tagata “Osana i le alo o Tavita; ia manuia le afio mai i le suafa o le Alii”

### **UIGA O UPU:**

- |      |           |   |                                 |
|------|-----------|---|---------------------------------|
| i)   | ta'taiina | – | aumai, ta'ita'i, faasino        |
| ii)  | fa'ae'e   | – | fa'ati'eti'e,                   |
| iii) | fofola    | – | fa'ata'atia i lalo, fola i lalo |
| iv)  | sala      | – | tipi i lalo, tu'u i lalo        |
| v)   | alalaga   | – | valaau leotetele                |
| vi)  | osana     | – | faaola mai                      |

### **GALUEGA FAATINO:** Faatino le tala


**PESE:** Osana pepese tamaiti uma, tamaiti uma, tamaiti uma  
Osana pepese tamaiti uma  
Ua afio mai le Tupu

Ua ti'eti'e atu i Ierusalemā, i Ierusalemā, i Ierusalemā  
Ua ti'eti'e atu i Ierusalemā  
I luga o le asini

Ua latou fola laupama i le ala, laupama i le ala, laupama i le ala  
Ua latou fola laupama i le ala  
Pepese ma Osana

**A'OA'OGA:**

1. Alalaga ma Osana ua afio mai le Mesia
2. O Iesu le Tupu Sili



**UA TIETIE IESU I LE ASINI I IERUSALEMA**

**ASO SA:** 20 APERILA 2025

**MATAUPU:** UA TOETU LE ALII (ASO SA TOETU)

**SINI:** Ia malamalama le vasega, o le toetu o Iesu mai le tuugamau o le faailoga lea o lona manumalo

**TUSI FAITAU:** Luka 24: 1 – 11

Fuaiupu 5 & 6: “Ua matatau i latou, ua punou foi o latou mata i le elelee, ona la fai mai lea ia te i latou, “Se a le mea tou te saili ai le ua soifua i e ua oti? E le o iine o ia, a ua tu; ia outou manatu i lona fetalai atu ia te outou, ina o i Kalilai o ia”

### **FESOASOANI MO FAIAOGA:**

O le uluai aso o le vaisapati, na o ai Maria le Makatala, o Ioana, ma Maria le tina o Iakopo, e asi le tuugamau o Iesu. O se vaaiga na maofa ai i latou, ina ua latou o atu ua fulieseina le maa mai le gutu o le tuugamau. Na latou ulu atu i totonu o le tuugamau, peitai ua leai se tino maliu o Iesu. Peitai na faaali mai agelu e toalua faapea mai “Se a le mea tou te saili ai le ua soifua i e ua oti? E le o iinei o ia, a ua tu:” Ioe o le faailoga lena o le manumalo a’ia’i o Iesu Keriso, e ala i lona toetu mai le oti ma le tuugamau.

E moni lava ua toetu le Alii, o le faailoga o le manumalo, o le ata vaaia e le mafai e le oti ona manumalo ia Iesu Keriso le alo o le Atua. A faauau le tala ma le mataupu o loo i lalo, ua o atu tina sa o e asi le tuugamau, ma tala’i atu le tala i le mea na o latou vaai ai, le faaaliga mai agelu, ua toetu Iesu.

### **UIGA O UPU MA FUAITAU:**

- |      |                            |   |  |
|------|----------------------------|---|--|
| i)   | vaisapati                  | – | uluai aso o le vaiaso, taeao o le Aso Sa   |
| ii)  | tafa o ata                 | – | taimi o le taeao, ua amata ona mou ese atu le pogisa, ae fotua’i mai le malamalama     |
| iii) | fulieseina                 | – | tulei ese, aveese  |
| iv)  | fememea’i                  | – | le mautonu, popole, fefefe   |
| v)   | ofu pupula                 | – | faatusa i ofu o agelu, ua sinasina mai, poo ua susulu mai lona malamalama              |
| vi)  | e le o iinei o ia; a ua tu | – | faatusa i se tagata sa taoto; a ua tula’i. O loo faatatau ia Iesu ua toetu mai le oti. |

**GALUEGA FAATINO:** Faatino le tala.

**PESE:** He is Lord, He is Lord  
He has risen from the dead  
And He is Lord  
Every knee shall bow  
Every tongue confess  
That Jesus Christ is Lord

He is life, He is life  
He has died and set us free and He is life  
And He calls us all  
To live evermore  
That Jesus Christ is Life

He is Love, He is Love  
He has shown us by his life  
And He is Love  
Every people sing with one voice of joy  
That Jesus Christ is Love

**A'OA'OGA:**

1. O Iesu ua manumalo i le oti
2. Ua saunia e Iesu le ala mo tagata uma





**UA TOETU LE ALII MAI LE TUUGAMAU**

**ASO SA: 27 APERILA 2025**

**MATAUPU: UA TOFIA MATATIA E FAI MA SO'O**

**SINI:** Ia malamalama le vasega, e filifili e le Atua i tatou e faia lona finagalo

**TUSI FAITAU:** Galuega 1: 23 – 26

### **FESOASOANI MO FAIAOGA:**

Ina ua maliu Iesu, ma toetu mai le tuugamau, ua afio a'e o Ia i luga le lagi, ae auina ifo lona Agaga Paia ma tauto'alua ai lona 'au so'o e o e tala'i le Tala Lelei. O le taimi tonu lea, ua toe sefulu ma le tasi so'o o Iesu, aua foi oti Iuta. Ua manatu ai loa Peteru ma le au so'o ua tatau ona saili se tasi e sui ia Iuta, ina ia faaatoa ai le fauainumera e 12 o le au soo o Iesu.

E tusa o le molimau a Tusi o Galuega, o le tagata e avea ma so'o ia poo le o le a filifilia e faia le faiva o le aposetolo; o se tagata sa molimau i le toetu ma le maliu o Iesu. O lona uiga, o le tagata ua na ia taliaina Iesu i lona olaga mai lava i le taimi na papatiso ai e Ioane. O le ala lea na filifili ai loa Matatia ma Iosefa o sō o laua o le a avea ma so'o e sui ai Iuta.

Ua latou fai le vili poo ai o le a avea ma so'o. O nisi ia o auala sa faaaogaina i le Feagaiga Fou faapena foi i le Feagaiga Tuai, e fai ai a latou filifiliga ma saililiga. O lea na faia ai loa le vili e le au soo, faatasi ma la latou tatalo i le Atua o Ia e silafia mea uma, o le Atua e filifilia le tagata mo lana feau.

Tamaiti, na faasaga le vili ia Matatia, ma tofia ai loa o ia e faia le finagalo o le Atua. Ua tofia Matatia e na te faaauaina le galuega, e faia le faiva o le aposetolo e ala i le tala'iina o le finagalo o le Atua. O lona uiga e tofia foi tatou e le Atua e ala i so'o se valaauina, e faatino lona finagalo.

### **UIGA O UPU MA IGOA:**

- i) femaliuai – fealua'i, savali solo
- ii) Pasapa – atalii o le Sapati
- iii) Iuso – o le igoa o Nu'u Ese. E mafua mai, ona o tagata Iutaia e lua a latou igoa, o le igoa Iutaia ma le igoa Nu'u Ese, le ala lena o le faaigoa ai o Iosefa le igoa Iutaia ia poo Pasapa foi.
- iv) vili – o faiga ia faa Iutaia ia poo taimi foi o le Feagaiga Tuai, e fua ai a latou faaiuga fai ma a latou filifiliga. O le faatinoga o le faiga o le vili e eseese lava faiga, o nisi o faiga e faatino i le fagu ona faataamilo lea. Fai mai nisi o molimau a le au suesue, fai mai e tusi le igoa i luga o le ma'a, ona tuu lea i totonu o se fagu, ona lūlū lea. O le maa o loo i ai le igoa e muamua pa'ū mai fafo, ia o le tagata na ua tasi i ai le faaiuga.

### **GALUEGA FAATINO: Maze Runner**

Saili poo fea le auala e vave ona o'o ai i le tini. Manaia ae fesoasoani ai faiaoga mo le faatinoina o le taaloga ( toe sui)



**PESE:**        Ua ou filifili

Ua ou filifili e mulimuli ia Iesu ×3

Ou te le toe foi ×2

I have decided to follow Jesus ×3

No turing back ×2

Le satauro i o’u luma, le lalolagi i o’u tua ×3

Ou te le toe foi ×2

The cross before me, the world behind me ×3

No turning back ×2

**A’OA’OGA:**

1. E fa’aaogaina e le Atua i tatou e faia lona finagalo
2. O le Atua e tofia i tatou



**UA TOFIA MATATIA E FAI MA SO'O**

**ASO SA:** 4 ME 2025

**MATAUPU:** O LE LOTO TETELE O IOANE MA PETERU

**SINI:** Ia malamalama le vasega ia aua nei fefefe a ia lototetele e tautatala atu i tagata i le upu moni e pei o Ioane ma Peteru.

**TUSI FAITAU:** Galuega 4: 13-22 (MO LE FAIAOGA)  
Galuega 4: 13 (MO LE VASEGA)

Fuaiupu 13: “Ua vaai i latou i le loto tele o Peteru ma Ioane, ma ua iloa o tagata e le i aoaoina i laua ma le valelea, ua latou ofo ai; ua latou iloa foi o i laua sa latou faatasi ma Iesu”

### **FESOASOANI MO FAIAOGA:**

O Peteru ma Ioane o isi ia soo o Iesu sa mulimuli ma vaavaai i vavega na Ia faia. O lea ua afio Iesu i le lagi a ua avea ai nei i laua ma molimau ola o le Talalelei i tagata. O le tasi o vaega taua o le la molimau, o le faamaloloina lea o le tagata ua fa sefulu ma ona tupu tausaga talu ona pipili. A ona o le la molimau e uiga i le toe tu mai o Iesu Keriso ma lona mana ua mafai ai ona la faamaloloina le tagata pipili, o le mafuaaga lena o le itagia ai o i laua e ositaulaga, o taitai o le malumalu, o satukaio ma nisi o ta’ita’i o le lotu Iutaia. Na molia i laua i luma o la latou fono, ma ua fesiligia foi Peteru ma Ioane po o le a le mana a’o le igoa foi o ai na la faia ai lenei mea? Ae na tali Peteru ua tumu o ia i le Agaga Paia, o le Suafa o Iesu Keriso le Nasareta.

Ua vaai le fono a le lotu Iutaia i le lototetele o Peteru ma Ioane e molimau ia Iesu ua toe faatuina mai e le Atua, faatasi ai ma le tagata pipili ua faamaloloina talu mai tausaga e fa sefulu ma ona tupu o lē mafai ona savali, ona latou tuuina atu lea o i laua e o. Peitai, na toe poloaiina i laua, ia aua lava nei la toe molimau atu ma tala’i atu i tagata le toe tu mai o Iesu Keriso. A o le lototetele o Peteru ma Ioane na toe tali atu ai ma le le fefefe i luma o le fono a Iutaia, ua tonu lava i ai laua ona la tautatala atu ma molimau atu i tagata i mea ua la vaavaai ma fa’alogo i ai e uiga ia Iesu Keriso.

O le taunuuga o le tala tamaiti, na saoloto Peteru ma Ioane auā ua leai se mea e molia ai i laua i luma o le fono a le lotu Iutaia. La te lei solomuli foi e ta’u atu le mea moni i ai latou, auā o i laua o tagata lototetele toe le fefefe. Ua la talitonu ma le faamaoni ia Iesu Keriso, o Ia lava na te puipui ma lavea’i i laua mai le tau faifai a tagata aemaise i latou o lo o latou teena le upu moni o le Talalelei. Ua aoao mai foi i ai tatou le fanau, ia tatou loto tetele ma faamalolosi mo le Tala lelei ia Keriso. E mafai foi ona aumaia ai le loto tetele i ai tatou e tatou te onosai ai i lo tatou ola aoaoina, aemaise o nisi o taimi tatou te augatata ai a??Ia manuia tele outou le fanau.

### **UIGA O UPU:**

- i) faamata’u – faafefe
- ii) le mautali – leai se tali, leiloa se mea.
- iii) faafiti – teena
- iv) vavao – taofi

### **GALUEGA FAATINO:** Tusiga Ata

Manaia ae saunia e lau susuga i le faiaoga ni pepa A4 po o ni cardboards e tufa i le vasega, e faatino ai le latou tusiga ata.

**PESE:** Ta'u mai tala ia Iesu  
Ta'u mai le tala ia Iesu fia faalogo ai  
Mea uma na ia faia a o i lalo nei  
Mea na ia afio iai o auala ma auvai  
Tala ia Iesu, Ta'u uma mai

**TELL ME THE STORIES OF JESUS**  
Tell me the stories of Jesus, I love to hear  
Things I would ask Him to tell me, if he were here  
Scenes by the wayside, tales of the sea  
Stories of Jesus tell them to me

**A'OA'OGA:**

1. Aua le fefe e tautala i le upu moni
2. Lototele e auauna
3. Faamaoni i le aoga



**O LE LOTOTETEELE O IOANE MA PETERU**



**ASO SA:** 11 ME 2025

**MATAUPU:** O LE FAFINE MA'I VEVELA (ASO SA TINA)

**SINI:** Ia malamalama le vasega, o le tago ifo o Iesu i le lima o le fafine, ma faatu i luga na malolo ai lava

**TUSI FAITAU:** Mareko 1: 29 – 31

Fuaiupu 31: “Ona tago atu lea o Ia ia te ia, ua tago ifo i lona lima, ua faatu ia te ia i luga; ona mavae loa lea o lona ma'i vevela, ona auauna lea o ia ia te i latou”

**FESOASOANI MO FAIAOGA:**

O le mae'a ai o a'oa'oga a Iesu i le sunako, ona latou o ai lea i le fale o Simona ma Anetere'a, masalo ua o'o i le taimi e fai ai sina malologa. Peita'i o le taunuu atu o Iesu i le fale, na Ia silafia ai le tinā o le avā a Simona, ua maua i le ma'i vevela (fiva)

“Ona tago atu lea o ia ia te Ia, ua tago ifo i lona lima, ua faatu ia te ia i luga; ona mavae loa lea o lona ma'i vevela, ona auauna lea o ia ia te i latou”

O le faamaloloina e Iesu o le tina o le toalua o Simona, na ia auauna ai ia te i latou. O lona uiga o le tagata ua talia Iesu, ua na talia le faamalologa a Iesu. E pei foi la o lenei tina ma'i vevela, o lona uiga ua talitonu ma mulimuli ia Iesu. O le uiga lena o le auauna ia te i latou, ua ofo le ola e fai ma auauna a Keriso

**UIGA O UPU:**

- i) sunako – fale tatalo, fale tapua'i
- ii) ma'i vevela – (fever), e mafua ona oso i luga le vevela o le tagata, i se ma'i o aafia ai, ia poo se vaega foi o le tino na lavea. Le ala lena o le tupu ai o le ma'i vevela, ia pe ua oso foi le fiva.

**GALUEGA FAATINO:** Valivaligā Ata

Fai ni kopi o le ata o lo o i lalo, e tufa i le vasega mo la latou galuega faatino

**PESE:** O lima agalelei  
O lima o Iesu  
O lima agalelei  
E alofa i tagata uma  
E faamalolo i tagata mama'i  
Ma faamanuia i tamaiti ×2

Tali: O nai ona lima e auauna ai  
E tali i lau valaau  
O lima o Iesu  
O lima agalelei  
E alofa i tagata uma.

**A'OA'OGA:**

1. Ia fai tatou ma auaua ia Iesu
2. E fa'amalolo e Iesu o tatou ma'i



**O LE FAFINE MA'I VEVELA**



**fear not; believe only, and  
the shall be made whole. Luke 8:50**

**ASO SA:** 25 ME 2025

**MATAUPU:** O LE TOFI O SĀ LEVĪ

**SINI:** Ia malamalama le vasega, o Sa Levi o lo latou tofi o le faitaulaga i le Atua

**TUSI FAITAU:** Teuteronome 18: 1 & 2

Fuaiupu 1: “O le au faitaulaga o sa Levi

**FESOASOANI MO FAIAOGA:**

O Levi o le atalii lona tolu lea a le toeaia o Iakopo mai lana fanau e toa 12. E leai sona tofi poo sona fanua i le vaevaeina o fanua o Isaraelu.

O le tofi o Levi, o le faitaulaga i luma o le Atua, o a latou mea e ai ma mea e inu, o mea ia e maua mai i faiga taulaga i luma o le Atua.

Peitai o le faasinoga lava lea o le ituaiga o Sa Levi e galulue, mo le osiina o taulaga, ma fai galuega mo le atinae’ina o lana Tala Lelei. Fai mai le fuaiupu e 2 “E leai sona tofi faatasi ma ona uso; o le Alii o lona tofi o ia, e pei ona fetalai mai o ia ia te ia”.

Ioe, e eseese lava tofiga a le Atua, e ala i le faaaogaina o le soifua ma le ola o le tagata. O lona uiga e tofu uma lava le tagata ia ma tofi ma tiute ua tofia ai. Ae ua manino lava foi i le aumaiga e le Tusi Paia, le tofi o Sa Levi, o i latou o le au faitaulaga, e leai so latou fanua ae galulue mo le Atua ma lona finagalo.

**UIGA O UPU:**

- i) au faitaulaga – o tagata latou te osi taulaga, e ala i le fasi o se mamoe poo se povi foi; ona tuu lea i luga o le fata faitaulaga, e faamu ma faa manogi.
- ii) tofi – (inheritance) e mafai ona faapea o faamanuiaga, o tiute tau ave ma lo latou faasinomaga, e pei o lea e faasino i le au Sa Levi.

**GALUEGA FAATINO:** Matematega

Faaigoa mai ata nei o loo i lalo, ma o latou aogā (ata o le leoleo, fuimu, faifeau, sua auala, faiaoga, fomaini)

**PESE:** Le alofa o le Atua

**A’OA’OGA:**

1. E tofu lava le tagata ia ma lona tofi mai le Atua.
2. E faaaogaina e le Atua i tatou i so’o se valaauina



**O LE TOFI O SA LEVI**







alamy

Image ID: F35NTH  
www.alamy.com



## **MANATU TAIALA O IUNI & IULAI: E OFOFOGIA MEA NA FAIA E LE ALII**

O masina nei e lua, o lea tatou faalogologo ai i nisi o mea ofoofogia na faia e le Alii o Iesu a o i ai i le lalolagi. o tala i vavega na faia e Iesu, e tulaga ese ai le Alii mai isi tagata i le faatinoga o le faatuatua, aemaise o le alofa. E faalagolago pea le malamalama o fanau i le faamatalaina o tala i se auala faafagogo ma faigofie mo i latou.

**ASO SA: 1 IUNI 2025**

**MATAUPU: O LE VAI UA LIU UAINA**

**SINI:** Ia malamalama le vasega, na faaliliuina e Iesu le vai e avea ma uaina

**TUSI FAITAU:** Ioane 2: 1 – 11 (MO LE FAIAOGA)  
Ioane 2: 7 (MO LE VASEGA)

Fuaiupu 7: “Ua fetalai atu Iesu ia te i latou, “Ina faatutumu ia o vai i suavai”. Ona latou faatutumu lea, ua oo lava i lau.”

### **FESOASOANI MO FAIAOGA:**

Sa i ai Iesu i le faaipoipoga na fai i le nuu o Kana i Kalilaia. E toatele tagata na i ai i le ‘aiga o le faaipoipoga, atoa ai ma le tina o Iesu. Na uma le uaina, a e le i uma le faaipoipoga.

Na popole le tina o Iesu ma ua ia fai atu ia te Ia, “Ua leai sa latou uaina”. Ua fai ane foi le tina o Iesu i auauna, “O se mea lava e fai mai ai o ia ia te outou, ia outou faia”

Na faatonuina e Iesu auauna ina ia asu mai le vai e faatutumu ai vaimaa lapopoa e ono. Ina ua tutumu lelei vaimaa, ona fai ane loa lea o Iesu ia te i latou, “Ina asu ane ia, ina ave i le pule i le tausamaaga.

Na ofo tele le pule o le tausamaaga i lona tofo atu, ua le o se vai, a o le uaina ua sili atu na i lo le uaina na avatu muamua.

Tamaiti, o le vavega lena na faia e Iesu, na ia liliuina ai le vai e avea ma uaina.

### **UIGA O UPU:**

- i) o’o i lau – ua tumu lelei
- ii) uaina – o le vaiinu e gaosi mai le vine

### **GALUEGA FAATINO: TAPENAINA O LE VAIINU**

- a) Ia tapena e le faiaoga se sioti (jug) vai, pepa fai vai lanu mumu ma le sipuni
- e) Ia fai se vaiinu e faamatamata ai le vasega ma faamatala i ai le vai ua sui le lanu i le mumu

**PESE:** O IESU O LE VAI OLA (fati – Iesu le uo a tamaiti)

1. O le vai lelei e maua ia Iesu  
Maua ia Iesu, maua ia Iesu  
O le vai lelei e maua ai le filemu  
Fiafia ma filemu

2. O le vai ola e maua ia Iesu  
Maua ia Iesu, maua ia Iesu  
O le vai ola e maua ia Iesu  
Fiafia ai ma filemu

**A'OA'OGA:**

1. E fai e Iesu mea lelei mo i tatou
2. E ofoofogia vavega a Iesu
3. Sa faaliliuina e Iesu le vai i le uaina

**ASO SA:** 8 IUNI 2025

**MATAUPU:** UA TOE OLA LE NA OTI

**SINI:** Ia malamalama le vasega na faaola e Iesu le tama na oti

**TUSI FAITAU:** Luka 7: 11 – 15 (MO LE FAIAOGA)  
Luka 7: 15 (MO LE FAIAOGA)

Fuaiupu 15: “Ona nofo ai lea i luga o le na oti, ua tautala; ona ia tuuina atu lea o ia i lona tina”

**FEASOASOANI MO LE FAIAOGA:**

A o i ai Iesu i le aai o Naina, na o ane ai tagata ia te ia ma le fata, o loo taoto ai se tama ua oti. O le tama e toatasi a le fafine ua oti lana tane poo lona toalua. Na silasila atu Iesu i le fafine, ona tupu ai lea o lona alofa ia te ia. Ua pa’i atu Iesu i le fata ma fai atu i le tama; “Le taulealea e, ou te fai atu ia te oe, Ina tulai ia”. Ona nofo ae lea i luga o le tama, ua tautala; ona ia tuuina atu lea o ia i lona tina.

Ua ofo tagata uma sa i ai i lea aso, ona o le vavega na faia e Iesu. Ua latou vivii foi ma faafetai i le Atua. Ua latou faapea ane foi, ua oo mai ia i latou le perofeta sili, ua asi mai le Atua i lo latou nuu.

**GALUEGA FAATINO: VALIVALIGA ATA**

Ia fai ni kopi o le ata ua saunia ma tufa i le vasega e galulue ai.

**PESE:** HE’S ABLE  
He’s able, He’s able  
I know He is able  
I know my Lord is able  
To carry me through

He heals the broken hearted  
And set the captives free  
He makes the lame to walk again  
And set the blinds to see

That’s why He’s able, He’s able  
I know He is able  
I know my Lord is able  
To carry me through

O le Atua na te mafaia  
Ua ou iloa o Ia e mafaia  
Ua ou iloa e mafaia e le Alii  
Ona fesoasoani mai

Filemu e loto mafatia  
Sa’oloto e saisaitia  
O pipili ua savavali fiafia  
O tauaso ua vivii ia te Ia

Ua ou iloa o le Atua, na te mafaia  
Ua ou iloa o Ia e mafaia  
Ua ou iloa e mafai e le Alii  
Ona fesoasoani mai

**A'OA'OGA:**

1. Ua faaola e Iesu le tama na oti
2. E alofa Iesu i tamaiti
3. Ia vivii ma faafetai i le Atua





**ASO SA: 15 IUNI 2025**

**MATAUPU: UA VAELUAINA LE SAMI ULAULA**

**SINI:** Ia malamalama le vasega, o le mana o le Atua na vaeluaina ai le sami i le to'oto'o o Mose

**TUSI FAITAU:** Esoto 14: 15 – 30 (MO LE FAIAOGA)  
Esoto 14: 16 (MO LE VASEGA)

Fuaiupu 16: “a o oe, ia e sii i luga lou tootoo, ma faaloaloa lou lima i luga lou tootoo, ma faaloaloa lou lima i luga o le sami, ma e vaeluaina ai; e o atu ai le fanauga a Israelu i totonu o le sami, i le iliti tai matutu”

### **FESOASOANI MO LE FAIAOGA:**

Na malie Farao e tuu mai le nuu e o, peitai, na toe tuliloa mai lava e fitafita ma o latou solofanua ma kariota. Ua fefefe le nuu uma aua ua tuliloa mai i latou e Farao ma ana au. Ua valaau atu Mose i le Atua ina ia fesoasoani mai aua ua na le iloa le mea o le a fai.

Ina ua oo mai le nuu i le sami ulaula, ma ua leai lava se isi ala e toe ui ai. E le mafai foi ona toe foi i tua aua o loo tulitloa ma ii latou e Aikupito. Ua fetalai mai le Atua ia Mose, ina ia sii i luga lona tootoo ma faaloaloa, ona vaeluaina ai lea o le sami. E matua ofoofogia le mea na tupu. Na sau le matagi tele mai sasa'e ma faatafeese ai le sami, ma ua vaeluaina ai. Ua iloa atu foi le eleele matutu, ona savavali ai lea o le fanauga a Israelu seia oo atu i le isi itu. Ua o atu pea fitafita a Farao ma tuliloa atu le nuu, peitai, e le i oo i le isi itu, aua na malelemo uma i le sami ulaula.

Tamaiti, o se mea ofoofogia lea na faia e le Atua i le sami ulaula, lea na faaoga ai le tootoo o Mose. E faigofie mea uma i le Atua.

### **UIGA O UPU:**

- i) tuliloa – mulimuli atu i tua
- ii) ofoofogia – o se vaaiga e ofo ai le loto
- iii) sami ulaula – sami tele ma loloto

### **GALUEGA FAATINO: FAATINO LE TALA**

Ia faatino e le vasega le tala

**PESE:** Vaeluaina o le sami (fati: Tagata poto na fau lona fale i luga o le papa)

E faapefea na sopoia e Mose o le sami ×3  
O le Atua na vaeluaina o le sami

Mose tuu i luga o lou tootoo ×3  
Ma vaeluaina ai le sami loloto

**A'OA'OGA:**

1. 'O le mana o le Atua na vaeluaina ai le sami ulaula
2. E alofa le Atua i lona nuu o Isaraelu
3. E ofoofogia mea e faia e faia e le Atua





**ASO SA:** 22 IUNI 2025

**MATAUPU:** UA FAAMALOLOINA NAAMANU

**SINI:** Ia malamalama le vasega, o le vaitafe o Ioritana na fufui ai le tino ma'i o Naamanu, ma mamā ese ai lona lepela

**TUSI FAITAU:** 2 Tupu 5: 1 – 14 (MO LE FAIAOGA)  
2 Tupu 5: 14 (MO LE VASEGA)

Fuaiupu 14: “Ona alu ifo ai lea o ia, ua fufui faafitu i Ioritana, e tusa ma le upu a le tagata o le Atua, ona foi mai ai lea o lona tino tuai pei o le tino o le tamaitiiti, ua mama foi ia”

### **FESOASOANI MO LE FAIAOGA:**

O Naamanu, o ia o le taitai ‘au a le ‘au tau a Suria. O se tagata e toa ma malosi. E maua o ia i le ma'i o le lepela. Ona aumai lea e le ‘au tau a Suria le tasi teineitiiti o le taua mai Isaraelu, ua fai ma auauna a le ava a Naamanu. Ua iloa e le teineitiiti o lo o maua Naamau i le ma'i lepela, ona ia fai atu lea i le ava a Naamanu, “O lo o i ai le Perofeta i Isaraelu, atonu e maua ai se fesoasoani mo le ma'i o Naamanu”.

Ua faalogo i ai le tupu o Suria, ona ia ave le ao le tusi i le tupu o Isaraelu, ina ia fa'ate'a le ma'i lepela o Naamanu. Ua alu le malag a Naamanu ma tuuina atu le tusi i le tupu o Isarelu, ona ita ai lea o le tupu ma saeia ona ofu. Ona fai atu lea o Elisaia i lana auauna, ia alu e faailoa atu ia Naamanu, e alu e taele faa fitu i le vai i Ioritana, ona te'a ese ai lea o le ma'i lepela mai lona tino.

Ua faailoa atu ia Naamanu le mea e fai, peitai ua ita Naamanu ma faapea ane, e tatau ona sau i fafo Elisaia ma valaau i le Suafa o le Alii i lona Atua, ma talo lona lima ona fa'ate'a ese ai lea o le lepela mai lona tino. Ua le fiafia lava Naamanu ma toe foi atu i Suria, ae peitai, ua o ane nisi o ana auauna ma tauanau o ia, ina ia usitai i le faatonuga a Elisaia, atonu e mama ai lona ma'i lepela. Ona alu ifo lea o Naamanu, ua fufui faa fitu lona tino i le vai i Ioritana, ona te'a ese ai lea o le ma'i lepela mai lona tino.

### **UIGA O UPU:**

- i) Lepela – ma'i o le pa'u. E fulafula ma papala
- ii) Perofeta – auauna a le Atua

### **GALUEGA FAATINO: TALIGĀ FESILI**

#### **FESILI:**

1. O ai le igoa o le taitai ‘au a Suria”  
Tali: Naamanu
2. O ai le igoa o le Perofeta o loo taua i le tala?  
Tali: Elisaia
3. O ai le igoa o le vai lea na faatonu e le Perofeta Naamanu e alu e taele ai?  
Tali: Vai i Ioritana

4. Na faa fia ona taele Naamanu e tusa o le faatonuga a Elisaia?

Tali: E faa fitu

**PESE:** (fati: You Tube – Six little ducks

1. O Naamanu o le taitai au  
Na faaletonu lona mafaufau  
Ina ua faatonuina e Elisaia  
E alu e tofu faa fitu i le vai Ioritana
2. Ae na usitai lava i le perofeta  
Ma alu ai lona o lana taelega  
Na ia iloa ai lea o le vavega  
Ina ua mama ai o lona lepela
3. E taua le usitai i le Atua  
Ia usitai foi i matua  
O le finagalo moni lea o le Atua  
E faamanuia ai ia i taua

**A'OA'OGA:**

1. E matautia vavega e faatupu e le Atua
2. O le alofa o le Atua e ala mai i ana auauna
3. Tatou usitai i le Atua


# Elisha and the Miraculous Healing of Naaman the Leper

2 Kings 4:38 thru 6:23



**UA FAAMALOLOINA NAAMANAU**





**ASO SA: 29 IUNI 2025**

**MATAUPU: UA TAUTALA LE ASINI**

**SINI:** Ia malamalama le vasega, na lē usitai le asini ia Palaamo ona o le agelu

**TUSI FAITAU:** Numera 22: 21 – 35 (MO LE FAIAOGA)  
Numera 22: 30 (MO LE VASEGA)

Fuaiupu 30: “Ona fai mai lea o le asini ia Palaamo, E le o lau asini ea a’u nei, ua e ti’eti’e ai talu ona e maua o a’u ua o’o mai i le aso nei? Ona faapea atu ai lea o ia, “E leai lava”

### **FESOASOANI MO LE FAIAOGA:**

Na tietie le perofeta o Palaamo i lana asini, ua o faatasi ma alii o Moapi, ma agai atu e fetuu pe faamalaia Isaraelu le nuu o le Atua. Ua le fiafia le Atua ia Palaamo, ina ua malaga atu i le laueleele o Moapi, ona ia auina atu ai lea o e agelu a le Alii, ma taofi le malaga a Palaamo.

Na vaaia e le asini le agelu a le Alii o loo tu mai i le ala, ona ‘alo ese ai lea, ma ui i le vao. Ua sasa e Palaamo le asini ina ia toe foi i le ala, a ua tu mai le agelu a le Alii i le va o laina e lua o le tovine. Ua atili ai ona ‘alo le asini mai le ala, ma ua pipii i le aupa, ma iu ina omia ai ma le vae o Palaamo. Ua toe sasa ai foi e Palaamo le asini.

Ua toe tu mai foi le agelu a le Alii i le avanoa itiiti o le ala, ma ua le mafai ai loa e le asini ona toe laasia se isi ana laa, ma ua taoto ifo ai loa i lalo. Ona ita tele ai lea o Palaamo, ma ia toe sasa ai le asini i le laau. Ona faagaganaina ai lea e le Alii o le asini, ma faapea mai ia Palaamo, pe se a se mea ua ou faia ia te oe, ua e sasa faatolu mai ai ia te au?” A ua tali atu Palaamo, “aua ua e faaonoono mai ia te au, se ana ou i lou lima se pelu, poo penei ua ou fasi matea nei oe. Ua toe tali mai le asini, e le o lau asini ea au nei, ua e tietie ai talu ona e maua o au ua oo mai i le aso nei? Ona faapupulaina ai lea o mata o Palaamo, ma ia iloa ai le agelu a le Alii, o loo tu mai ma le pelu.

Ua iloa e Palaamo lona sese, aua na te le i iloaina le agelu a le Alii o loo tu mai i le ala e tetee i lana faigamalaga.

### **UIGA O UPU:**

- i) fasimate – fasi ia pe / mate, tape
- ii) vaapiapi – va iti
- iii) aupa – pa maa
- iv) faaonoono – faa ita
- v) fetuu – faamalaia

### **GALUEGA FAATINO: VALIVALIGA ATA**

Ia fai ni kopi o le ata ua saunia e tufa i le vasega e galulue ai

### **PESE: FAALOGO MA USITAI**

#### **A’OA’OGA:**

1. Ia usita’i i le Atua e manuia ai
2. Fai le mea sa’o ae le o mea sese







**ASO SA:** 6 IULAI 2025

**MATAUPU:** UA FAAMALOLO E IESU LE MA'I SUPA

**SINI:** Ia malamalama le vasega, o Iesu o Ia o le pule i mea uma

**TUSI FAITAU:** Mataio 9: 1 – 8 (MO LE FAIAOGA)  
Mataio 9: 6 & 7 (MO LE VASEGA)

Fuaipu 6: “A e peitai ina ia iloa e outou o i ai i le Atalii o le tagata i le lalolagi le pule e faamagalo ai agasala – ona fetalai atu ai lea o ia i le supa – “Ina tulai ia, ina ave lou moega, ma alu i lou fale”

### **FESOASOANI MO LE FAIAOGA:**

Ua maliu atu Iesu i lana lava aai, faauta foi, ua o mai tagata ma latou aumai ia te ia le tagata o loo maua i le ma'i supa, o loo taoto i le moega. Ualatou aumai le supa ia Iesu ina ia faamaloloina. A o Iesu, ua ia silafia lo latou faatuatua, ona fetalai atu ai lea o ia i le supa, “Lo'u atalii e, ina faalototele ia oe, ua faamagaloina au agasala”

Sa i ai faatasi i lea mea nisi o le au tusiupu, (o tagata nei latou te tetee i aoaoga ma fetalai a Iesu, atoa ai ma ana faamalologa) ua latou le fiafia ia Iesu ma lana fetalai na fai i le supa. Ua latou faapea ane, Ua faifai lenei tagata i le Atua. A o Iesu, ua na silafia mea uma ua latou manatunatu i ai, ona faapea atu lea o ia, “Se a le mea ua manatunatu leaga ai o outou loto?” Ae peitai, ina ia iloa e outou o i ai le Atalii o le tagata i le lalolagi le pule e faamagalo ai agasala, Ona fetalai atu lea o ia i le supa, “Ina tulai ia, ma ave lou moega, ma alu i lou fale. Ona tulai lea o ia, ua alu i lona fale ma le fiafia.

### **UIGA O UPU:**

i) supa – o le ma'i ua le mafai ona gaiioi le tino

### **GALUEGA FAATINO:** Faatino le tala

Ia faatino e le vasega le tala e pei ona faamatalaina

**PESE:** O lima o Iesu o lima agalelei

### **A'OA'OGA:**

1. E faamalolo e Iesu tagata mama'i
2. O Iesu tatou te malolo ai



**ASO SA:** 13 IULAI 2025

**MATAUPU:** UA TOETU LASALO NA OTI

**SINI:** Ia malamalama le vasega, na faaola e Iesu Lasalo mai le oti

**TUSI FAITAU:** Ioane 11: 17 – 44 (MO LE FAIAOGA)  
Ioane 11: 43 (MO LE VASEGA)

Fuaiupu 43: “Ua ia fetalai atu ia upu, ona alaga lea o ia ua leotele, “Lasalo e, ina sau ia i fafo”

**FESOASOANI MO FAIAOGA:**

Sa i le aai i Petania le tagata e igoa ia Lasalo ma ona tuafafine o Maria ma Mareta. O lenei aiga, sa alofagia e Iesu. Ua oo i le tasi aso, ua oo atu le tala ia Iesu, o lo o ma’i tigaina lana uo o Lasalo. Na faatalitali pea Iesu i ni nai aso, ona ia faia atu lea lea i ona soo, “O lo o moe la tatou uo o Lasalo, ae ou te toe alu e fafagu ia te ia.

E taunuu atu Iesu i Petania, ua fa aso talu ona i ai Lasalo i tuugamau. Ua lagona e Ia le alofa tele ia Maria ma Mareta ma le latou aiga, o lea na Ia alu atu ai i le tuugamau, ma faatonu nisi o tagata ina ia aveese le maa mai le gutu o le tuugamau. Ona tatalo ai lea o Iesu i le Atua. Ina ua mavae lana tatalo, ona ia alaga leo tele ai lea, “Lasalo e, ina sau ia i fafo”. Ona sau ai lea i fafo o Lasalo mai i le tuugamau, ua fusifusia ona vae ma ona lima, ua fusi foi ona mata i le solosolo. Ona fetalai atu lea o Iesu ia te i latou, “Tatala ia ia te ia, ina tuu atu ia e alu”

Tamaiti, e ese le ofoofogia o mea na faia e Iesu. E le gata ina faamalolo le tele o ma’i eseese, a ua ia mafai foi ona faaola le tagata na oti e pei o Lasalo.

**GALUEGA FAATINO:** Valivaliga Ata


Ia fai ni kopi o le ata ua saunia e tufa i le vasega e galulue ai

**PESE:** O le alofa o le Atua e ofoofogia

**A’OA’OGA:**

1. Ua faaola e Iesu Lasalo nai le oti
2. E ofoofogia galuega a Iesu





**ASO SA:** 20 IULAI 2025

**MATAUPU:** UA SOLO I LALO PA O IERIKO

**SINI:** Ia malamalama le vasega, o le mana o le Atua na solo ai i lalo le pa o Ieriko

**TUSI FAITAU:** Iosua 6: 1 – 5 (MO LE FAIAOGA)  
Iosua 6: 5 (MO LE VASEGA)

Fuaiupu 5: “A faalevaleva ona ili o le pu o le iupeli, pe a outou faalogo i le leo o le pu, ona alalaga lea o le nuu uma ma le leo tele; ona solo ai lea i lalo o le pa o le aai; ona o ai lea o le nuu uma taitasi i o latou luma.”

### **FESOASOANI MO FAIAOGA:**

O le nuu leni o Ieriko, e tu latalata i le vaitafe o Ioritana. E si’o uma le nuu e le ‘olo, o le aupa maualuga ua ati i maa ma sima. E faigata lava ona sao ai se tagata i totonu.

Na fesoasoani le Atua i le ta’ita’i o Isaraelu o Iosua, i le auala latou te maua ai ma faatoilalo pe faumatia le nuu o Ieriko. Na faatonu e le Atua Iosua ina ia latou faataamilo i le aai, o ‘au uma o le taua, ia tasi le faataamilosaga o le aai i le aso e tasi. Ia faapea ona faia i aso e ono, ia ave foi e faitaulaga e toafitu o pu e fitu i luma o le atolaau. O le aso fitu latou te faataamilo faafitu ai i le aai, e ilia foi pu e le au faitaulaga. A faalevaleva ona ilia o pu i le aso fitu, ona alalaga lea o le nuu uma ma le leo tetele, ona solo ai lea i lalo o le pa o le aai.

Na usitai Iosua ma latou faia leni mea ma le faatuatua i le Atua, ona solo fua lea o le aupa i lalo i le mana o le Atua

### **GALUEGA FAATINO:** Faatino le tala

Ia faatino e le vasega le vaega o le tala ua ili ai pu ma solo ai lalo le pa

- Ia faaoga ni pepa e taai e fai ma pu
- Ia faaoga se laulau e fau ai le pa i poloka laupapa pe uga foi
- Ia faataamilo le vasega i le laulau ma ili pu
- Ia sauni le Faiaoga e faamalepe le pa pe a taamilo mulimuli le vasega

### **PESE:**

Solo i lalo ×2  
Le pa o Ieriko ×3

### **A’OA’OGA:**

1. E fesoasoani le Atua ia i tatou i taimi uma
2. O Iosua le taitai e usitai i le Atua





**ASO SA:** 27 IULAI 2025

**MATAUPU:** O ELIA MA LE FAFINE SAREFATA

**SINI:** Ia malamalama le vasega, sa agalelei le fafine Sarefata ia Elia

**TUSI FAITAU:** 1 Tupu 17: 8 – 16 (MO LE FAIAOGA)  
1 Tupu 17: 9 (MO LE VASEGA)

Fuaiupu 9: “Tulai ia oe, ma e alu i Sarefata o le aai o Saitonu, ma e nofo ai, faauta, ua ou fai atu i le fafine o i ai ua oti lana tane, na te fafaga ia te oe.”

### **FESOASOANI MO FAIAOGA:**

Na fetalai le Atua i lana perofeta o Elia, e alu i le nuu o Sarefata, o lo o i ai le fafine ua oti lana tane, na te tausi ia te ia. Ona tulai lea o Elia ma alu i Sarefata.

Ua iloa atu e Elia le tasi fafine o loo fai fafie, ona ia valaau atu lea i ai, sei aumai se ipu vai sei inu ai. Ua sau le fafine ma le ipu vai, ae ua ia toe fai atu i ai, sei aumai se fasi areto sei ona ‘ai ai. A ua tali ane le fafine, “O lo o soifua le Alii, e leai se potoi areto ia te au” Ua faapea ane le fafine ia Elia, ua toe lava o sina fasi falaoa ma sina suauu itiiti i le fagu o totoe. Sa ia sau e fai atu ni fafie e fai ai se la meaai ma si ana tama, ona feoti ai lea, aua ua leai se mea e ‘ai o totoe. Ua fai atu le perofeta o Elia i le fafine, “Aua e te fefe! Alu e fai le mea lea ua ou fai atu e fai. Aumai muamau ia te au se potoi areto itiiti, ona faatoa lua aai ai lea ma laua tama. Ua fetalai mai le Alii le Atua o Issarelu, e le faaitiitia le suauu i le fagu, ma le falaoa i le kate, seia o’o i le aso e foaiina mai ai e le Alii le ua i le laueelele.

Ona alu lea o le fafine, ua ia usitai ma le loto talitonu ma le faatuatua i le mea sa fai atu ai Elia ia te ia. Ua moni lava upu a Elia, aua sa tele aso na nofo ai Elia i le fale o lenei fafine, ma sa le i uma le falaoa i le kate, e le i faaitiitia foi le suauu i le fagu

### **GALUEGA FAATINO:** Valivaliga Ata

Ia fai ni kopi o le ata ua saunia e tufa i le vasega e galulue ai.

<b>PESE:</b>	O le alofa o le Atua, e pei o se li’o tele Le alofa o le Atua, pei o se li’o tele E taamilo lava, leai se mutaaga E alofa mai o Ia Fai pea e le gata Ua alofa mai o Ia i aso uma lava	God’s love is like a circle A circle big and round And when I see the circle No ending can be found But when the love of Jesus Goes round eternally Forever and forever, I know that God loves me
--------------	--	--

### **A’OA’OGA:**

1. E faamanuia le Atua i tagata agalelei
2. E faamaoni le Atua i ana folafolaga
3. Ia tatou alolofa ma agalelei i tagata uma





paint the world  
**SUPER**  
COLORING

## MANATU TAIALA O AOKUSO: FINAU MA FAAMALOSI

UA manatu, tasi lenei vaega o le olaga e ao lava ona aoaoina ai le fanau. Ia o latou malamalama i le taua o le ola finau ma famalosi i lo latou ola tuputupua'e. Aua o le tasi lea o aoaoga a lo tatou Alii o Iesu mo le tagata faatuatua ina ia finau ma faamalosi i le molimau ia Iesu. O le faamoemoe lava ina ia tupu a'e le tamaititi ma ia iloa e manaomia lava le finau ma faamalolosi i soo se mea na te fai.

**ASO SA:** 3 AOKUSO 2025

**MATAUPU:** FAAMALOSI MA LOTOTELE

**SINI:** Ia malamalama le vasega i le taua o le ola finau ma le faamalosi i soo se mea na te fai. E i ai le taimi e le atoa ai lo tatou malosi ae o lo tatou faamoemoe ma faalagolago i le Atua, e fesoasoani mai e maua ai lo tatou malosi e mafai ai ona faia mea uma.

**TUSI FAITAU:** Iosua 1 : 1 – 7(faiaoga)  
Iosua 1 : 6 & 7(vasega)

Fuaiupu 6: "Ia e faamalosi ma lototele, auā e te tofia mo lenei nuu le laueleele na ou tauto ai i o latou tamā e foai atu ia te i latou."

### FESOASONI MO FAIAOGA:

Ina ua mavae le oti o Mose ua filifilia lea e le Atua o Iosua e fai ma taitai i le nuu o Isaraelu. Na iloa lelei e Iosua o le avea ma tagata e taitai o le nuu, e le o se galuega e faigofie, aua foi e toatele tagata o le nuu. Lea la ua fetalai mai loa le Atua ia Iosua, e sauni e taitai le nuu o Isaraelu. E ui lava e faigata ae aua le popole ia faamalosi ma lototele. E tausii mai ia e le Atua e pei foi ona faia ia Mose a o avea ma taitai o Isaraelu.

Tamaiti, fai mai ua faalogo Iosua i upu na fai mai ai le Atua, ia faamalosi ma lototele e fesoasoani mai ia te ia, e lei toe faatali ae ua tu loa i luga ma taitai loa Isaraelu e o i Kanana i le nuu na foai mai e le Atua mo latou

Ioe tamaiti, o le faamalosi lea a le Atua ia Iosua ina ia tulai mai, matuai faamalosi ma lototele, aua le fefe, aua le popole. Ia usitai ma faalogo i le Atua. Fai mai na taunuu ma le manuia Isaraelu i Kanana pei ona fai mai ai le Atua.

### UIGA O UPU:

- i) auauna - o le tagata e usitai ma faalogo, o le tagata galue mo le isi tagata
- iii) sopoia - savali atu i le isi itu ole vai o'o lelei le isi itu
- iii) tu'ulafoai - lē amanaia
- iv) tulafono - o faatonuga a le Atua e tatau ona usitaia

### GALUEGA FAATINO: Faatino le tala

Faamolemole manaia ae faaoga nisi o faiaoga Aso Sa e faatinoina le tala mo le fanau

**PESE:** Ou te tu mau ma pipi'i mau x2  
Satani e taumafai e liliu ese a'u  
Ou te tu mau ma pipi'i mau

Ia e tau malosi, tetee i le fili  
'Aua lava nei e faavaivai

A ia e tau mo le Alii o Au  
E aoga e tutumau

**A'OA'OGA:**

1. E iu lelei le tagata e lototele ma faamalosi
2. Galue faamalosi ma lototele i mea lelei



**ASO SA: 11 AOKUSO 2025**

**MATAUPU: O LE TAMĀ ALOFA (ASO SA TAMA)**

**SINI:** Ia malamalama le vasega o o tatou tama e alofa ia i tatou

**TUSI FAITAU:** Luka 15 : 11 – 24 (faiaoga)  
Luka 15 : 17 – 20 (vasega)

Fuaiupu 20: “Ona tulai lea o ia, ua alu i lona tama. Ua iloa mamao atu foi o ia e lona tama, ona mutimuti vale lea o lona alofa, ua momo’e atu o ia, ua fusi ia te ia, ma sogi atu ia te ia.”

### **FESOASOANI MO FAIAOGA:**

Faatalofa atu ia te outou le fanau i lenei taeao fou. O le tatou mataupu o lenei taeao, “O LE TAMĀ ALOFA”. O ai se tamaititi e alofa lona tamā ia te ia? Ioe tamaiti, tatou uma lava, e ese le alofa o tatou tamā ia i tatou, aua e tusa po’o le ā lo tatou lē usitai ma lo tatou faalogogatā e alofa lou tamā ia te oe.

Fai mai le tatou tala tamaiti, sa iai le tasi tamā ma lana fanau tama e toalua, o le tama matua ma le uii po o le tama laititi. Ua oo i le tasi aso ona mana’o lea o le tama laititi i lona tamā, ina ia aumai ia te ia lana vaega o le oa (tupe) ma le tamaoiga sei alu ai e tafao ma fiafia ai ma ana uo. Ua faia e le tamā e pei ona mana’o ai lona atalii laititi, ua alu le tama ua soona ulavale, ua tele le mimita ma ua fa’aaoga uma le tele o le tupe na ia te ia.

Tamaiti fai mai ua uma le tupe na alu ma le tama ona ia lagonaina lea o lona fia ‘ai. Ua alu ma nofo i le tasi aiga e fafaga a latou puua ma ‘ai ai foi i meaai a puua. Ua o’o i le tasi aso ona toe manatua ai lea e le tama laititi lona tamā ma lona aiga e tele a latou tupe, fai mai ua ia lagona lona sesē ona tonu lea o lona manatu o le a toe foi i lona tamā.

Fai mai, o aso uma lava e nofonofo a le tamā ma vaai mai po o le a le taimi e toe foi mai ai lona atalii, ae ina ua iloa mamao mai e le tamā lona atalii, e le i toe faatali ae ua momo’e mai faafeiloa’i i lona atalii ua ia fusi ma sogi atu ia te ia.

Tamaiti, e faapena le alofa o le tamā i lana fanau, po o le a lava lo tatou le usitai ma le faalogogatā, e alofa pea o tatou tamā iai tatou. E le gata la na’o tamā, ae faapena foi tinā. Ia manatua lelei e outou le fanau o le alofa o le tinā ma tamā e le uma mo tatou.

O lona uiga e tatau lava ona tatou faalogo ma usitai ia tamā faapea foi ma tinā. E faapena le alofa o le Atua mo i tatou, tigā lo tatou le usitai e alofa mai lava pea le Atua ia i tatou i aso uma ma taimi uma.

### **UIGA O UPU:**

- |      |              |   |                    |
|------|--------------|---|--------------------|
| i)   | mutimutivale | - | alofa naunau       |
| ii)  | sogi         | - | faafeiloai         |
| iii) | tamaoiga     | - | tagata ua maua mea |
| iv)  | matelaina    | - | fia ‘ai            |

## **GALUEGA FAATINO:**

Mata'itusi faatumu: Faamolemole faiaoga manaia ae faaaoga le ulutala e fai ai le galuega faatino po'o ni upu foi mai le lisi o uiga o upu, tapena lelei mataitusi ma ia malamalama lelei ai le fanau.

(faataitaiga – O le T\_m\_ A\_o\_a)

**PESE:** Lo'u tama ou te alofa ia te oe x2  
Tigā mea faigata  
E te onosai pea  
Lo'u tama ou te alofa ia te oe

## **A'OA'OGA:**

1. E alofa lo'u tama ia te au
2. E le faapito le alofa o le Atua
3. Aua nei galo le alofa o matua





**ASO SA: 18 AOKUSO 2025**

**MATAUPU: UA TOE FOI IAKOPO I LONA AIGA**

**SINI:** Ia malamalama vasega, ua na o le aiga e maua ai le fiafia

**TUSI FAITAU:** Kenese 31 : 1 – 3

Ua fetalai mai foi le Alii ia Iakopo, Ina toe foi atu ia i le nuu o ou tamā, ma lou aiga, ou te iai foi ia te oe.

**FESOASOANI MO FAIAOGA:**

A o nofo ai lava Iakopo ia Lapana le tuagane o lona tinā i tausaga e 7, sa auauna ai Iakopo ia Lapana. Sa tele foi ona tamaoaiga i lafu manu, na maua e Iakopo. Peitai ua o’o i le tasi aso e faalogo atu Iakopo ua fai mai atalii o Lapana ua ave uma e Iakopo lafu manu o la tamā, ma ua vaai atu Iakopo i mata o Lapana ua matua ita lava ia te ia.

Ua fetalai mai le Atua ia Iakopo, ina ia tu’ua e ia o Patanarama ae foi atu i lona aiga i Kanana ma ou te i ai foi ia te oe. E le i toe faatali Iakopo ae ua faalogo ma usitai i le Atua. Ua tapena loa lona aiga ma ana lafu manu ae ua toe foi atu loa i lona aiga i Kanana.

Tamaiti, e ese ma le taua o tatou aiga, po o fea lava tatou te o i ai, aua nei galo ia te oe lou aiga. O lou aiga e i ai lou tamā, o lou tinā, o ou uso, o ou tuagane ma ou tuafafine ma tagata o lou aiga. E i ai le tou fale ma le tou fanua. O lona uiga aua nei galo ia te oe lou aiga. O lou aiga na foai mai e le Atua ia te oe, o le mea e faasino ia te oe.

**UIGA O UPU:**

- |      |           |   |                     |
|------|-----------|---|---------------------|
| i)   | aveesea   | - | leai ni mea, aveese |
| ii)  | tamaoaiga | - | tupe ma oloa        |
| iii) | anamua    | - | aso ua leva         |

**GALUEGA FAATINO:** Fesili ma Tali

1. O ai Lapana.

**Tali:** O Lapana o le tuagane o Repeka

2. Aisea na toe foi ai Iakopo i lona aiga i Kanana?

**Tali:** Na fetalai i ai le Alii ina ia toe fo’i i le nuu o lona tamā

**PESE:** A iai Iesu i se aigā, o se aigā  
Aigā fiafia x2  
A iai Iesu i se aigā, o se aigā  
Aigā fiafia

**A’OA’OGA:**

1. O le aiga moni e maua ai le fiafia
2. Aua nei faagalo lou aiga
3. Alofa i lou aiga



**ASO SA:** 24 AOKUSO 2025

**MATAUPU:** UA FIA MALOLO LE TAGATA MA'I

**SINI:** Ia malamalama le vasega, o Iesu o le foma'i sili, na te mafai ona faamalolo so'o se ma'i

**TUSI FAITAU:** Ioane 5 : 5 – 9

Fuaiupu 9: "Ua fetalai atu Iesu ia te ia, "Inā tu ia i luga, ave ia lou moega, ma ia e savali." Ona malolo loa lea o le tagata ua ave lona moega, ma ua savali. O le Sapati foi lea aso."

### **FESOASOANI MO FAIAOGA:**

Fai mai le tatou mataupu tamaiti i leni taeao, "Ua fia malolo le tagata ma'i." O le uiga o le upu malolo tamaiti, "o le saoloto, po'o le aveese ni tigā, po ua maua le malosi fou.

Sa i ai se tasi tagata na maua i le ma'i, tusa ma le 38 tausaga o taoto, ua silafia lelei e Iesu ona mafatiaga, ua umi foi o feagai ia ma leni ma'i. Na iloa lelei e Iesu le mafatiaga o lo o feagai ma leni tagata ma'i. Pe afai ua 38 tausaga o mai, oka se tele o nei tausaga o feagai ma mafatiaga, o le ala lea na fesili ai Iesu, "E te fia malolo ea?" Ae i le taimi lea i le tagata ma'i, pau a lea o le ituaiga tala o lo o fia faalogo i ai, o le fia malolo ma le fia saoloto mai ma'i faigata.

Ae fai mai le tali a le tagata ma'i, e leai se isi e tuuina ifo a'u i le vai. O le tali e iloa ai ua leva na fia mapu ma fia malolo mai le mai o lo o feagai ma ia.

Tamaiti ua fetalai Iesu i le ma'i, Ina tu ia i luga ma ave lou moega ma ia e savali, ua e malolo. Fai mai ua malosi le ma'i i le faamalologa a Iesu. O le mana ma le silisiliese o Iesu na te faamalolo ai ma'i.

### **UIGA O UPU:**

- i) malolo - saoloto, po ua maua le malosi fou
- ii) gaepu - nenefu le vai (stirred up)
- iii) tolugafulu - tolu sefulu (30)

### **GALUEGA FAATINO:** Matamatagā Ata

Fautuaina faiaoga faamolemole ina ia saunia se ata o le faamalologa leni i le (YouTube) e faamatamata ai nai fanau ina ia o latou malamalama atili ai i le silisili ese o faamalologa ma galuega na faia e le Alii.

<b>PESE:</b>	Na te mafaia, x2	O loto ua mafatia
	Ou te iloa na te mafaia	Faasaoloto agasala
	Ou te iloa o Iesu e mafaia	O pipili ua savavali
	Ona faamaloloina	Ma tauaso ua vaavaai

### **A'OA'OGA:**

1. O Iesu le foma'i sili
2. E mafai e Iesu ona faamalolo ma'i uma
3. E alofa Iesu soo se tagata.



**ASO SA:** 31 AOKUSO 2025

**MATAUPU:** UA FINAU IAKOPO MA LE TAGATA

**SINI:** Ia malamalama le vasega o le ola finau e manumalo ai

**TUSI FAITAU:** Kenese 32 : 24 – 29 (faiaoga)  
Kenese 32 : 24 – 26 (vasega)

Fuaiupu 26: “Ua faapea mai foi o ia, Tu’u mai ia o a’u a ou alu, auā ua ao. A ua tali atu ia, Ou te le tu’uina atu lava oe seia e faamanuia mai ia te a’u.”

### **FESOASOANI MO FAIAOGA:**

Tamaiti, o le tatou mataupu o leni taeao “UA FINAU IAKOPO MA LE TAGATA”. Fai mai le tala ua tu’ua na o Iakopo, mulimuli ane ua la tauivi foi ma se tasi tagata seia o’o ina ao. A o tuua na o Iakopo i le isi itu o le alia, mulimuli ane ua ia tauivi ma se tasi tagata seia oo na ao. O le tagata lea na tauivi 94 pe na finau ma Iakopo tamaiti o le agelu a le Alii. Na aoina ina o faia leni finauga ma ua faiaina ai le agelu. Ona ia pa’i atu lea i le suilapalapa o Iakopo ma se’e ai le fa’iga o lona suilapalapa.

Tamaiti, ua faiaina le agelu i le la finauga ma Iakopo, lea sa ia manao ai iā Iakopo e tu’u atu ia se’i alu ua ao. Peitai e le’i tu’uina e Iakopo leni tagata e alu seiloga ua faamanuia mai ia te ia. Sa fesili foi leni tagata ia Iakopo i lona igoa ae sa ia tali atu i ai, o a’u o Iakopo.

Tamaiti, na suia le igoa o Iakopo ia Isaraelu, e le agelu aua e pei o se alii ua la finau ai i le Atua atoa ma tagata, ma ua manumalo ai.

Ioe tamaiti, o le naunau lava o Iakopo ina ia faamanuia atu le Alii ia te ia na toe fesili ai lava i le igoa. Manatua foi tamaiti e ala eseese mai faamanuiaga a le Alii ia te i tatou le fanau, e le faigofie ona tatou saili mo ni faamanuiaga. A le aunoa ma lo tatou naunau ma faatino ma le loto atoa, tatou te le faamanuiaina.

### **UIGA O UPU:**

- i) fagatua - tauivi, piiga (wrestle)
- ii) aoina - malamalama
- iii) suilapalapa - vaega pito i luga o le vae po’o le fa’iga (hip socket)

### **GALUEGA FAATINO:**

Valivaliga ata: Faamolemole faiaoga ina ia fai ni kopi (copies) o ata ma tufatufa i tamaiti e vali

**PESE:** Jesus is a winner man  
Winner man  
Jesus is a winner man  
Winner man all the time  
  
Winner man  
Winner man all the time

**A'OA'OGA:**

1. E manuia le tagata e ola finau i mea lelei
2. Aua le fiu gofie
3. Ia ola finau ma tatalo
4. Faamalosi, aua le faavaivai





## **MANATU TAIALA O SETEMA: O NISI O TINĀ O LE TUSI PAIA**

Ua fia faamāmāfaina i mataupu o lenei masina, le sao taua ma le aoga o tinā i totonu o āiga, nu’u, atunuu ma Ekalesia. O tinā o pae ma āuli, o tinā o le ola i totonu o āiga, a leai se tinā e le atoa se fiafia ma maopopo se āiga.

**ASO SA:** 7 SETEMA 2025

**MATAUPU:** O MARIA LE TINĀ O IOANE

**SINI:** Ia malamalama le vasega, o le tina o Ioane na ia faamaopoopoina le au kerisiano i lona fale e tatalo mo Peteru a o i ai i le falepuipui.

**TUSI FAITAU:** Galuega 12: 12 – 16

Fuaiupu 12: “Ua mafaufau ai o ia, ona alu lea i le fale o Maria le tinā o Ioane, ua igoa ia Mareko; e toatele sa faapotopotoina ai, ma latou tatalo.”

### **FESOASOANI MO FAIAOGA:**

I le taimi o le malosi o sauaga i le au Kerisiano a le tupu o Herota, lea na ia taumafai ai lava ina ia ta pu’e ia i latou ua fai ma taitai ole lotu Kerisiano. O lea na o latou pue ai Peteru, ma ave loka seia oo i le aso e faamasino ai i luma o tagata iutaia.

Peitai i lea taimi ua faapotopotoina ai e Maria le tina o Ioane le au Kerisano i lona fale, ma fai ai tatalo mo Peteru a o loka ai i le falepuipui. O lea na tupu ai le vavega i le falepuipui, ua te’i Peteru la e moe, a o lokaina ona lima i filifili uamea, ae fafagu o ia e le agelu. Ua tatala ma ona lima ae taitaiina o ia i fafo seia oo i le faitotoa tele o le aai.

E le talitonu Peteru i le mea ua tupu, faapea lava ia o se faaaliga ae leiloa o le mea moni lava ua tupu ia te ia. Ua tau manatunatu Peteru ona alu ai loa lea i le fale o Maria le tina o Ioane, o ina o lo o i ai uma le au Kerisiano o lo o tatalo mo ia.

Tamaiti ese ma le taua o le galuega na faia e Maria le tina o Ioane, sa ia faapotopoto le au Kerisiano e tau fai tatalo mo Peteru ma e sa feagai ma le talaiina o le galuega a Iesu. Ua tatou iloa ai foi o Maria o se tina e ola faamaopoopo, e ola magafagafa ma mataala i taimi uma ma o se tina foi e alofa

### **UIGA O UPU:**

- i) faapotopotoina - o tagata ua faatasi i se nofoaga e tasi
- ii) toina - ave ese
- iii) olioli - fiafia


### **GALUEGA FAATINO:**

Faatino le tala: Fautuaina lava tou susuga i faiaoga ina ia faatino le tala mo le fanau

**PESE:** Olioli i le Alii o lo’u malosi lea

**A'OA'OGA:**

1. E taua le ola tatalo
2. Ia fiafia e mafuta ma isi uso kerisiano
3. E taua le sao o tina



**UA FAAPOTOPOTO E MARIA LE TINA O IOANE LE AU KERISIANO  
MA TATALO MO PETERU**

**ASO SA:** 15 SETEMA 2025

**MATAUPU:** O ANA LE PEROFETA FAFINE

**SINI:** Ia malamalama le vasega e tatau ona tatou ola tatalo ma mafuta i le Atua i taimi uma, tatou te manuia ai.

**TUSI FAITAU:** Luka 2 : 36 – 38

Fuaiupu 37: “E lei alu ese ia i le malumalu a ua auauna o ia i le Atua i anapogi ma talosaga i le ao ma le po.”

### **FEAOASOANI MO FAIAOGA:**

Sa iai i le malumalu i Ierusalem le Perofeta fafine o Ana, i ona po sa fanau ai Iesu. O Ana o le afafine o Fanuelu o le ituaiga o Asera, o le fafine ua oti lana tane ina ua mavae tausaga e fitu sa nonofo ai, a o taupou o ia. E valusefulu ma le fa tausaga o lona soifua.

Sa nofo o ia i le malumalu ma auauna ai i le Atua i anapogi ma talosaga i le ao ma le po. E ese le toaga o lenei fafine e tatalo i le malumalu i le ao ma le po. Pe a tatou fua i ai i le matua o lona soifua a o lo’o ia faia pea lenei galuega o le anapogi ma tatalo i le Atua. O se fafine e tumu lona loto i le faatuatua ma talitonu i le Atua, ma o lona lea naunautaiga ia ofoina lona ola atoa e auauna ai mo le Atua.

Tamaiti, ese le manaia o le tatou mataupu i lenei taeao, ia tatou pei o le Perofeta fafine lenei o Ana, e toaga e anapogi ma tatalo i le Atua. Ioe e taua le ola tatalo, tatou toaga e tatalo i le Atua i taimi uma ao ma le po. Tatalo i le Atua e foai mai le ola ma le malosi aemaise le poto ma le mafafufau lelei ia i tatou.

Faapena foi i taimi tatou te aai, taimi tatou te feala ai i le taeao, a o le i momoe ai foi i le po. Tamaiti aua nei galo o le tatalo o le auala lea e fesootai ai tatou ma le Atua i so’o se mea tatou te manana’o ai, taimi e maua ai tatou i ma’i o le tino, taimi o faanoanoaga aemaise o taimi e afea ai tatou i faafitauli ma luitau o le olaga. O le tatalo e fesootai ai tatou ma le Atua

### **UIGA O UPU:**

- i) perofeta - auauna a le Atua
- ii) malumalu - falesa / fale tapuai ai tagata i le Atua
- iii) anapogi - lē ‘ai e lē inu i le aso atoa

### **GALUEGA FAATINO:**

Valivaliga Ata – Faamolemole faiaoga ia fai ni kopi o ata ua saunia mo le mataupu ina ia tufatufa i tamaiti e valivali

**PESE:** (fati you tube)  
Prayer is the key x2  
Prayer is the Master key  
Jesus started with prayer  
And ended with prayer  
Prayer is the Master key

## A'OAOGA:

1. E taua le ola tatalo
2. O le tatalo e feso'otai ai ma le Atua
3. Tatalo i le Atua i taimi uma



**O ANA LE PEROFETA**



**ASO SA:** 21 SETEMA 2025

**MATAUPU:** UA ALOFA RUTA IA NAOMI

**SINI:** Ia malamalama le vasega o le faamaoni o le alofa o Ruta na ia mulimuli ai pea ia Naomi le tina o lona toalua.

**TUSI FAITAU:** Ruta 1: 15 – 19 (MO LE FAIAOGA)  
Ruta 1: 16 (MO LE VASEGA)

Fuaiupu 16: “A ua fai atu Ruta, Aua e te finau ia te au ina ia ou tuulafoai ia te oe, ia le mulimuli atu ia te oe; aua o le mea e te alu ai, ou te alu ai foi; o le mea e te nofo ai, ou te nofo ai, e fai lou nuu mo’u nuu; e fai lou Atua mo’u Atua”

### **FESOASOANI MO FAIAOGA:**

O le tala masani le tala ia Naomi ma Ruta, o Ruta o le teine Moapi, o le teine o nuu ese, sa nofotane ia Maalona le atalii o Naomi. Fai mai ua oti Elimeleka, ua maliliu foi tama o Maalona ma Kiliona, o se mea e le taugofie mo le tina ia Naomi, o le oti uma o le tama o le aiga ma le fanau.

Ua faalogo Naomi ua faamanuia le Atua i Peteleema i lona nuu ma lona aiga, aua sa i ai le oge na mafua ai ona o ese ma nonofo i Moapi. Ua ia fai atu foi ia Ruta ma Orepa ina ia toe foi atu i o laua aiga. Fai mai le tala, ua toe foi atu Orepa i ona atua ma lona aiga, a’o Ruta ua le mafai ona ia tuua o Naomi, fai mai le upu a le tusitala, ua pipii atu Ruta ia te ia, o le faailoga o le alofa ua mafanafana, ua le toe fia foi i ona atua, ua ia iloa o loo i Peteleema le Atua moni, le Atua o loo auauna i ai Naomi ma lona aiga.

A tatou mafaufau loloto lava i lenei tala, e ogaoga le tiga ua fetaia’i ma Naomi, peitai o le atoaga o lenei tala, o loo taoto mai ai le alofa o le Atua. O le alofa lea na faatino e Ruta, o le alofa faa le Atua, o le alofa e moni, e le mafai lava ona ia tuua le tina o lona toalua, na mulimuli lava Ruta ina ia faamanuia mai Naomi ia te ia.

O le taunuuga lea o le mulimuli a lenei tina, ua tusia lona igoa i le gafa o Iesu le Alo o le Atua na afio mai e togiola le lalolagi. Fai mai upu a Ruta ia Naomi, o le mea e te alu i ai, ou te alu iai, o le mea e te nofo ai ou te nofo ai foi, e fai lou nuu ma o’u nuu, e fai lou Atua ma mo’u Atua, o le mea e te oti ai, e tanu ai foi a’u. O le moni lea ma le faamaoni o Ruta ia Naomi, na iloa manino i lana tautinoga lea. Tamaiti e faaogaina e le Atua lo tatou ola e ala mai ai lona finagalo ma faaalua ai lona mana silisili ese pe afai tatou te alolofa faamaoni ia te ia ma faia lona finagalo.

O le Atua e alofa mai pea ia i tatou, poo le a le tele o faigata tatou te fetaia’i e le mafai ona ia tuulafoaiina i tatou, o lona alofa faamaoni na ia auina mai ai lona Alo pele e toatasi ina ia faia le faaolataga mo i tatou o lana fanau agasalala ina ia mafai ona tatou maua ona manuia e le aunoa.

**GALUEGA FAATINO:** Valivaliga Ata

**PESE:** Le alofa o le Atua e ofoofogia

**A'OA'OGA:**

1. E faamaoni le alofa o Ruta ia Naomi
2. E alofa le Atua i tagata uma
3. Ia tatou alolofa i o tatou matua







**ASO:** 28 SETEMA 2025

**MATAUPU:** UA TOE FAAOLAINA E PETERU O TAPITA

**SINI:** Ia malamalama le fanau, o le tatalo ma faatuatua i le Atua e ala mai ai lona mana faaola i so'o se tagata

**TUSI FAITAU:** Galuega 9: 36 – 42

Fuaiupu 40: “A ua tuli atu Peteru ia te i latou uma lava i fafo, ona to’otuli lea o ia, ma tatalo; ona faasaga atu lea o ia i le oti, ua faapea atu, “Tapita e, ina tu ia i luga.” Ua pupula o ia; ua na iloa Peteru, ona nofo lea i luga.”

### **FESOASOANI MO FAIAOGA:**

Sa i le nu’u o Iopa se tasi so’o fafine e igoa ia Tapita, ua ta’ua pe a faamatalaina o Toreka. O lenei tina ua tele ana galuega lelei ma mea alofa na ia faia. O Tapita o se tinā e loto alofa ma loto fesoasoani, e fiafia e ofo ana galuega alofa i tagata lautele. Fai mai ua maua o ia le ma’i ma oti ai.

O Peteru o le tasi lea o so’o faamoemoeina ma ua alofaina e Iesu. Fai mai ua afio a’e Iesu i le lagi ae auina mai lona Agaga i ona auso’o e faatino ai ana galuega alofa i so’o se tagata. Fai mai ua faalogo le au so’o o i ai Peteru i le nu’u o Lita e felata’i ma Iopa, ona auina atu lea o tagata e to’alua e aami ia te ia. E le’i toe faatali Peteru fai mai ua tulai ma ō, ona aveina a’e lea e i latou o Tapita i le afeafe aupitoaluga. Sa tutū ma fetagisi ai foi fafine ua oti a latou tane. O i latou ia sa molimauina galuega lelei e tele na fai e lenei tinā.

Tamaiti, ua tulia uma i fafo latou uma nei ona to’otuli lea o Peteru ma tatalo, fai mai o le mana o le Atua na auala faatasi mai ma le faatuatua o Peteru ua toe faaolaina ai Tapita.

### **UIGA O UPU:**

- i) Iopa - o le nuu sa faaolaina ai e Peteru Tapita
- ii) Tapita (Toreka igoa Eleni) - o le tinā e tele ana mea lelei ma galuega alofa na ia faia
- iii) mulumulu - fufulu poo le faamama
- iv) afeafe aupitoaluga - vaega pito i luga o le fale

### **GALUEGA FAATINO:** Fesili ma Tali

1. O fea le nuu sa faaolaina ai e Peteru Tapita?

Tali: O Iopa

2. O a ni uiga lelei o lenei tina?

Tali: Loto alofa, loto fesoasoani, loto foai

3. O ai le isi igoa o Tapita?

Tali O Toreka

4. O ai Pereru?

Tali: O le so’o o Iesu

**PESE:** Auro ma ario e leai  
A o se ua ia te a'u  
Ou te avatu  
I le suafa o Iesu  
Le Nasareta tulai ia ma savali

**Tali -** Savali ma oso {  
Ma vivi'i i le Atua {x2  
I le Suafa o Iesu  
Le Nasareta tula'i ia ma savali

**A'OA'OGA:**

1. Tatalo i le Atua e le aunoa
2. Fai se galuega lelei mo le isi tagata



**ASO SA: 26 OKETOPA 2025**

**MATAUPU: O LE TAMAITAI SUNEMA**

**SINI:** Ia malamalama le vasega e manuia le tagata e agalelei i so o se tagata.

**TUSI FAITAU:** 2 Tupu 8: 1 – 2 (mo le Faiaoga)  
2 Tupu 8: 1 (mo le Vasega)

Fuaiupu 1: “Ua fai atu Elisaia i le fafine na faaolaina e ia lana tama tane, ua faapea atu. Tu ia i luga ina outou o ma lou aiga, ia aumai i se mea e mafai ona e aumau ai, auā ua valaau e le Alii i le oge, e oo ai foi i le nuu tausaga e fitu”.

### **FESOASOANI MO FAIAOGA:**

Talofa tamaiti, ua umi foi ona malolo i le lotu tamaiti. Ia o a mai outou i lenei taeao, o le tatou mataupu mo lenei Aso Sa – O le tamaitai Sunema.

O le tinā lea sa nonofo ma lona toalua i le nuu lea o Sunema, Ua matutua lava i laua ae leai se la fanau. Peitai, sa faamanuiaina e le Atua ma maua ai le la tama tane. O le tinā lea sa agalelei ia Elisaia le auauna a le Atua. Sa latou nonofo, tausi ma fesoasoai ia te ia a’o galue ai i le nuu lea. Sa ma’i le tama a le tinā lea ma oo lava ina oti.

Ua logo ia Elisaia le tama lea ua oti. Ona sau lea o Elisaia ua tatalo i le Atua ma tuu ona lima i luga o le tama.

Tamaiti, na toe ola le tama a le fafine Sunema. Ua malosi ma ua toe mafuta fialia si o latou aiga. O le galuega lelei na faia e Elisaia ona o le agalelei o le fafine lea ma lona aiga ia te ia.

### **GALUEGA FAATINO:**

1. Faatino le tala - le vaaiga o le toe faaolaina o le tama  
- Faatino e le faiaoga ma le vasega
2. Saunia ni ata talafeagai e malamalama atili ai le tala.

**PESE:** Tamaitai Sunema  
O se tinā lelei, tinā lelei x 2  
Na toe ola si ana tama  
Ona o lona agalelei.

(Ulu, tauau, tulivae tamai vae)

### **A’OA’OGA:**

1. Ia agalelei i so o se tagata
2. E alofa le Atua i tagata uma.



## MANATU TAIALA O NOVEMA: O LE ALII E FAAOLA

O le manatu taiala o lenei masina o lo o faamamafa ai le mana lavea'i ma faamalolo o le Alii. O lo o atagia i tala o le Tusi Paia aua ni a'oa'oga taua e tapueina ai le ola tutupu a'e o le fanau.

**ASO SA:** 2 NOVEMA 2025

**MATAUPU:** VAA O NOA I ARARATA

**SINI:** Ia malamalama le vasega e tatau ona usitai tagata i le Atua.

**TUSI FAITAU:** Kenese 8: 1 – 4 (mo le Faiaoga)  
Kenese 8: 4 (mo le Vasega)

Fuaiupu 4: “O le fitu o masina, ma lona aso e sefulu ma le fitu, na toa ai le vaa i luga o le mauga o Ararata.”

### FESOASOANI MO FAIAOGA:

Talofa tamaiti, o ai foi lea na fau le vaa? Ioe o Noa, o le tatou mataupu – Vaa o Noa i Ararata.

Na umi lava se taimi o i ai pea le lolo (vai luga o le fogaeleele). Peitai na manatu loa le Atua o le a ave ese le vai ua taofia le timu, ua punitia alā vai o le sami ma le fogaeleele.

Ua le toe mafai ona alu le vaa. Ua to'a (tu) i luga o le mauga o Ararata. Sa nonofo ai pea i latou, Noa ma lona aiga i totonu o le vaa. (Noa ma lona toalua, o lana fanau e toa tolu tama ma a latou avā)

Ona ua mautinoa lava ua leai se vai ua toe matutu le fogaeleele. Ua faailoa atu foi e le Atua ia i latou ua sagaolemu le latou tuua o le vaa. Ua faasaoina Noa ma lona aiga ma manu uma ia na mafai ona ave i le vaa. Tamaiti e laveaiina/faasaoina le tagata e faalogo ma usitai i le Atua.

### GALUEGA FAATINO:

#### 1. Tusiga Ata

Tufa ni pepa ma vali i tamaiti tusi mai ai ata

- manu na faasaoina mai le lolo
- Noa ma lona aiga
- Vaa o Noa i luga o mauga o Ararata

#### 2. Matamataga Ata: Fai ni kopi o ata ua tuuina atu i le lesona, po o nisi ata talafeagai e faamatamata ai tamaiti.

**PESE:** Faalogo ma usitai  
E leai se isi ala  
E fiafia ai Iesu  
Na o le faalogo ma usitai

### A'OA'OGA:

1. E lavea'iina le tagata usitai.
2. E lelei le ola usitai.





**ASO SA: 9 NOVEMA 2025**

**MATAUPU: TUU TULAFONO IA MOSE I LE MAUGA O SINAI**

**SINI:** Ia malamalama le vaega ia usitai i tulafono a le Atua.

**TUSI FAITAU:** Esoto 31: 12 – 18 (mo le Faiaoga)  
Esoto 31: 18 (mo le Vasega)

Fuaiupu 18: “Ua uma atu ana fetalaiga ia Mose i le mauga o Sinai, ona avatu ai lea e ia ia te ia o papa e lua o le tulafono, o papa maa lava na tusia e le aao o le Atua.”

### **FESOASOANI MO FAIAOGA:**

Tamaiti o le a le uiga o le upu tulafono. Ioe o ni faatonuga e tatau ona usitai i ai. E masani ai tatou i o tatou aiga. E i ai ni feau po o ni galuega e faatonuina e o tatou matua po’o o tatou faiaoga. E pei o le a le upu e fai pe a e mana’o i se fesoasoani meaai, ioe faamolemole a maua ia faafetai

E faapena foi la lo tatou Atua e iai ana tulafono e tatau ona tatou usitaia. E silafia e le Atua e tatau ona i ai ni tulafono e manuia ai le tagata. E pei – Ia e ava (fa’aaloalo, usitai i lou tamā ma lou tinā o le a faalevaleva ai ou aso i le nuu o le a foa’iina mai e le Alii lou Atua ia te oe.

Ia o tulafono la ia e sefulu na tuuina e le Atua ia Mose i le mauga o Sinai. E ave e Mose i le nuu, o Isaraelu latou te usitai i ai.

Lea foi ua a’oa’oina mai ai i tatou. E tatau ona tatou usitai i tulafono ia, mai le Atua. E manuia le tama ma le teine e usitai.

### **GALUEGA FAATINO: Solo**

E fautuaina lau susuga i le faiaoga, e a’o le solo lea i le fanau

1. Alu Mose i luga o le mauga o Sinai  
O tulafono ua tuuina mai  
E lua papa maa ua tusia ai tulafono  
E tatau ona tatou usitai ma faalogo
2. E sefulu tulafono o loo tusia i le Tusi Paia  
O taiala na o le ola manuia  
A’oa’o tulafono  
Ma ia teu i lou loto

**PESE:** Tulafono a le Atua (fati: Afai ua e fiafia patipati ou lima)

Tulafono a le Atua mo tagata uma  
Tulafono a le Atua mo tagata uma  
Tulafono a le Atua  
Ia e usitai ma faamuamua  
Tulafono a le Atua mo tagata uma

**A'OA'OGA:**

1. Usitai i lou tamā ma lou tinā
2. Usitai i tulafono a le Atua.



**ASO SA: 16 NOVEMA 2025**

**MATAUPU: O LE FANUA O KETESEMANE**

**SINI:** Ia malamalama le vasega o le tatalo o le auala sili lea e maua ai e le tagata le malosi.

**TUSI FAITAU:** Mataio 26: 36 – 38 (mo le Faiaoga)  
Mataio 26: 36 (mo le Faiaoga)

Fuaiupu: “Ona oo ai lea o Iesu faatasi ma i latou i le fanua ua igoa ia Ketesemane; ua faapea atu foi o ia i le au soo, “Ia outou nonofo iinei, seia ou alu iila ou te tatalo.”

**FESOASOANI MO FAIAOGA:**

O le fanua lea o Ketesemane, na o ai Iesu ma lona au soo e tatalo. A o i ai Iesu ma ona soo, ua malolo ai foi ni tagata e nonofo ai. Ua nonofo soo o Iesu i le isi itu o le fanua ae ua alu atu o ia i le itu i luma. Ua tatalo o Ia i lona Tamā e alofa ma fesoasoani mai a o feagai o Ia ma le tele o faigata.

Tamaiti, o le auala lea sa faia e Iesu, o le tatalo ma lona talitonu e pule le Atua ia te Ia. E alu Iesu e tatalo a o ona soo na o le momoe.

Na iloa lelei e Iesu le lē mataala ma le faavaivai o ona soo. Tamaiti, sa tumau pea le malosi o Iesu ona o le tatalo i lona Tamā, e pei ona ia tuu atu o Ia, e pule ai lona Tamā. E tataua ona tatou toaaga e tatalo i le Atua tatou te manuia ai.

**GALLUEGA FAATINO:**

a) Matamataga Ata

Saunia ni ata talafeagai e fa’aali ma faamatala le mataupu.

e) Pese: Faitau le Tusi Paia  
Ma tatalo i aso uma

i) Fai faatasi le tatalo a le Alii - Lo matou Tama e, o i le lagi

**PESE:** Whisper a prayer in the morning

**A’OA’OGA:**

1. Fa’aavanoa sou taimi e te tatalo ai.
2. Fai sau tatalo
  - (i) pe a e ai
  - (ii) o le a e moe
  - (iii) ua e ala mai i le taeao



**ASO SA:** 23 NOVEMA 2025

**MATAUPU:** ATO E 12 I TOE 'AIGA

**SINI:** Ia malamalama le vasega na lava ma totoe meaai na aai ai le motu o tagata

**TUSI FAITAU:** Ioane 6: 9 – 14 (mo le Faiaoga)  
Ioane 6: 13 (mo le Vasega)

Fuaiupu 13: “Ona faapotopoto ai lea, ua tutumu ai ‘ato e sefulu ma le lua i toe aiga, o areto karite e lima, o mea ia na totoe i e na aai

### **FESOASOANI MO FAIAOGA:**

Tamaiti, o lo o faagasolo pea galuega ma a’oa’oga a Iesu ma ona so’o. Ua faamaloloina foi ma’i e Iesu, ua atili ai le to’atele o tagata e mulimuli ia i latou.

Ua iloa foi e Iesu ua fia aai tagata ua leva le aso. E le o i ai ni meaai ia i latou. Sa faailoa ane e se tasi o ona so’o o lo o i ai se tamaitiiti, o lo o i ai ni areto karite e lima ma ni i’a iti e lua lau (lua i’a). Sa aumai ia Iesu, ona ia faafetai lea ma tufatufa atu i tagata.

Tamaiti, e matua toatele tagata sa i ai i lea mafutaga. Sa maoona tagata ma na totoe areto, ma sa faatonu e Iesu ona so’o e faapotopoto toe ‘aiga ‘aua nei maumau. Ua latou faapotopoto ma ua tutumu ai ato e sefulu lua.

Ua iloa e tagata le galuega lelei na faia e Iesu (faailoga). Ua latou saga talitonu ai pea o le perofeta lava lenei tagata.

Tamaiti, e leai se mea e faigata ia Iesu. E alofa Iesu i tagata uma.

**GALUEGA FAATINO:** Ia faatino le tala.

1. Faatino le tala, sauni mea ai (fasi falaoa) e lau susuga e faasoa atu i le vasega.
2. Fai ni kopi o le ata ua saunia, e valivali e tamaiti.

**PESE:** Lo’u Atua e, ua ou fia ai Ia e fafaga ia te a’u

### **A’OA’OGA:**

1. Faasoa atu i isi au uo
2. E leai se mea e faigata ia Iesu.
3. Na maoona tagata uma i meaai
4. Faafetai i le Atua mo meaai





**ASO SA:** 30 NOVEMA 2025

**MATAUPU:** UA TUPU SOLOMONA IA ISARAEU

**SINI:** Ia malamalama le vasega e manuia le tagata e faalogo ma usitai i le Atua

**TUSI FAITAU:** 1 Tupu 3: 5 – 9 (mo le Faiaoga)  
1 Tupu 3: 6 (mo le Vasega)

Fuaiupu 6: “Ona tali atu ai lea o Solomona, Na e alofa tele i lau auauna o lo’u tama o Tavita, ina ua savali o ia i ou luma ma le faamaoni, ma le amiotoni, i le ma le loto sao i ou luma; ua e tausia foi mona lenei alofa tele ua e foaiina ia te ia le atalii e nofo i lona nofoalii, e faapei ona fai i le aso nei”

### **FESOASOANI MO FAIAOGA:**

Ua tupu Solomona ia Isaraelu. Tamaiti, o Solomona o le atalii o Tavita. Na sosoo lava Solomona ma lona tamā o Tavita.

A o malolo Solomona i le po, ua faailoa mai le Atua ia te ia, pe i ai se mea na te manaomia. Peitai na ia tali atu i lona agalelei i lona tamā o Tavita, o le sa tausii ma le faamaoni e tusa ma ala na ia finagalo i ai. E le gata i lea, ua ia tofia foi o ia lona atalii e avea ma tupu. O le mea na ia manaomia, ia foai mai ia te ia, o le loto matala e faigofie ai ona faia ona tiute.

Tamaiti, e manuia outou le fanau i galuega lelei sa faia e o outou matua. O galuega ia e silafia/iloa uma lava e le Atua.

O tatou matua sa aveina i tatou i le aoga, faatonu ma a’oa’oina lelei tatou. Saunia lelei o tatou aiga ina ia tatou ola lelei ma fiafia i le lumanai.

### **GALUEGA FAATINO:** Matamataga Ata

Manaia foi ae ki se ata mai le You Tube, o le tala ia Solomona e faa matamata ai le vasega

### **A’OA’OGA**

1. Usitai i ou matua ma so o se tagata matua e manuia ai
2. A lelei ona tapena le taimi nei, ua lelei foi le lumanai.



**ASO SA:** 1 TESEMA 2025

**MATAUPU:** UA VIVII LO’U LOTO I LE ALII

**SINI:** Ia malamalama le vasega, ia e faafetai ma vivii i le Atua pe afai ua faamanuiaina oe.

**TUSI FAITAU:** Luka 1: 46 – 48 (mo le Faiaoga)  
Luka 1: 46 (mo le Vasega)

Fuaiupu 46: “Ona fai ane lea o Maria – “Ua vivii atu lou loto i le Alii,”

### **FESOASOANI MO FAIAOGA:**

Talofa tamaiti. O ai foi le igoa o le tinā o Iesu? O Maria

Na faailoa e le agelu ia Maria, o le a ia fanaua se tama tane. E faaigoa foi o Ia ia Iesu. E lei soona filifilia Maria. Na silafia lelei e le Atua o ia o se tinā lelei. Sa le i faigofie foi ona taliaina e Maria le fa’aaliga, ae o lona talitonu atoatoa i le Atua na ia taliaina ai.

Tamaiti na talia e Maria ma vivii loa o ia i le Atua. E pei ona i ai fuaiupu o lo o fa’aaogaina i le tatou mataupu. Ua ia lagona le loto faafetai, vivii ma le loto maualalo.

Ia e tatau foi ona faapea i tatou tamaiti. A avea i tatou ma tama ma teine lelei, e fiafia foi o tatou matua ma isi tamaiti ia i tatou.

Tatou te lagona le fiafia ma faafetai i le Atua. Tamaiti ‘aua nei galo ona e faafetai i le Atua i so o se mea lelei tatou te maua.

### **GALUEGA FAATINO:**

1. Matamataga Ata:

(i) Fai ni kopi o ata ua saunia e matamata ai tamaiti.

### **PESE:**

Vivii lou loto i le Atua

Ua olioli foi lou agaga i le Atua lou Faaola

Aua ua silasila mai o ia i lana auauna fafine

Ua faamaualaloina

(fati: Pese masani a le Katoliko)

### **A’OA’OGA:**

1. Toaga e tatalo i le Atua.
2. Faafetai ma vivii ia te Ia.
3. Auai i lotu i totonu o lou aiga.





**ASO SA:** 8 TESEMA 2025

**MATAUPU:** O LE PUPULA NA ILOA E LEOLEO MAMOE

**SINI:** Ia malamalama le vasega o le fanau mai o Iesu na faailoa mai e le pupula o le Alii

**TUSI FAITAU:** Luka 2: 8 – 16 (mo le Faiaoga)  
Luka 2: 9 (mo le Vasega)

Fuaiupu 9: “Faauta foi, ua tu mai ia i latou le agelu a le Alii, ua pupula faataaliolio mai foi ia te i latou le pupula o le Alii, ua matua fefefe ai lava i latou.”

### **FESOASOANI MO FAIAOGA:**

Tamaiti o le tatou mataupu i lenei taeao – O le Pupula na iloa e leoleo mamoe. O leoleo mamoe, o i latou ia e vaaia ma tausia lafu mamoe i le vao. Ia saogalemu ma lelei le vao e aai ai ma ia lava le vai.

A o i ai i latou i le vao i se tasi po, sa latou vaaia se malamalama ua susulu malosi mai, sa faateia i latou, sa lagona foi lo latou fefefe. Peitai sa latou faalogoina le leo o le agelu ua faapea mai. E ‘aua latou te fefefe. O le aso nei, o le a maua ai se tala fiafia e olioli (fiafia) ai tagata uma o le a fanau ai le Faaola o Ia le Keriso le Alii.

Ua fanau o Ia i le fale o manu. Sa faafuasei loa ona faatasi mai agelu ma ua latou vivii i le Atua. Ua latou pepese e faapea – “O le viiga i le Atua i mea aupitoauluga, ma le manuia i le lalolagi”

Ona toe foi lea o agelu i le lagi ae ua o i latou i Peteleema ma latou vaaia ai Maria ma le pepe o Iesu i le fale o manu.

Tamaiti na saunia lava e le Atua fa’aaliga i le lalolagi mo le fanau mai o le Faaola o Iesu Keriso

### **GALUEGA FAATINO:**

Faatino le tala – Faiaoga ma nisi o le vasega.

**PESE:** Pese o le Kerisimasi

### **A’OA’OGA:**

1. Na faailoa mai e le Atua le fanau mai o le Faaola.
2. Talia ma le fiafia le fanau mai o le Mesia.

